

LUCAS NAAJIOTASANO JESUCRISTOJINIJI

Niya pohuatashiyari casaara Lucas naajiotaquiaari nioni

¹ Queraatia pueyari suraatia naajionu saniniujuiquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na cotelesacari. Nojoriiri na nuhuaji na rupaa pohuatanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhuaaj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. ⁴ Naacuajitij, quiocuara naajiyanjia na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohuatasacari Tiuquinijiona Juan rasaanutaniya

⁵ Herodes jaara jiyaniijia quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquihuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquihuacuajinio supueno quiquiaari. Nojori supuetanaari mariyata

tariucuacaanu pueyacuara secojonaa quiquiaari.
⁶ Zacaríasri necocua Isabelta maninia miijiaca quiquiaari Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari.
⁷ Nojoriiri maja na muetunu quijia, niyajaru Isabel quiniuucua. Naajuhuaaj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari.
⁹ Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saajia naajosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacujitij Zacaríasri seeratasaaquiaari tii na tiuquiniuria shanohua jaanutaja na catijianura.
¹⁰ Na catijasacari, puetunu pueyajanaari Pueyaso secojonuuriquiaa Secojoua tia carijiniacuma.
¹¹ Jiyacaritij, Pueyaso seruuri Zacaríasqua muetaquiaari. Nujuariquiaari shanohua jaanutaja catijiasaqui miaquetajara.
¹² Zacaríasri shiriquirii na niquishacari Pueyaso seru.

Jiyanohua na puerereeri. ¹³ Pueyaso seruuri na sequeree:

—Maja puerenu Zacaríasnaa. Pueyasocujaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. ¹⁶ Nojuajaari queraatia Israel pueya tacatonutaniuhua nojori Jiyaniijia Pueyasocua. ¹⁷ Nio Juanri pa Jiyaniijia puetana quiniutianiya. Nojuajaari pueyara Pueyaso sequesano caminiujiunia supuetana Elías sohuanu jiitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijiaacuaji.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niquiocuaari motajajuhuj.

¹⁹ Pueyaso seruuri na riucuaaree:

—Janiyacujaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰ Quiarijia

saniniuujia, cua sequesanoocua quia tiyuaquini-uucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriiquitiurii pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua tohuatamohua. Majaari na naata pocuanu quiriquiaa. Nareja shishiniojoriquiaari. Naacuajitij, pueyari niishirii Pueyasoqui casaa niqutirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari.

²⁴ Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaarijiaatijia cinco raca. Nojuajaari tama sequequiaarijiaaja: ²⁵ “Quiarijiani, cua Jiyanijiaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶ Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia.

²⁷ Tamonu niyacoocua na jiyaroreeri, cante

tari sequesaaquiaaricujani José jiyaniishano pueyanota na caminiuria. Na camiriquianoori supuetana jiyaniijia David niquiohuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritasano niyaconaa. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

²⁹ Maríari jiyanoehua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” ³⁰ Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. ³¹ Quiarijjiani, quiaari manajenutianiya. Quiaari cayaniyojua ranutianiya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutianiya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jitianutianiya na pueyari. Majaari na shaajenu quiniutianiya Jiyaniijia na quishacari.

³⁴ Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojjia quiniutianiya. ³⁶ Naajuhuj, quia supuetanajinijinio motaja Isabelri neyanu ranutaniyajuhuj. Cuno maajiiri sequesaaquiaari “niyajaru maajitia”. Naajaa, seis racaari tari na shocojiya na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸ Maríari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

María quiasacari Isabel niqiniuucua

³⁹ Maríari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhuananuhuaraca.

⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María sequesano nojuaja, ¡conaajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jiiitianura.

⁴² Naacuajitij, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiriucuaa quiajaniya tamasa maajipohujiniji! ¡Maninia miiniutianiya quia niyanujaariuhuj!

⁴³ ¿Janiyateeri pueya tojishano maajini, cua Jiyaniijia nucua tiuquiniuria cua tiajinia,

na niquniuria janiya? ¡Maja! Naajaa, jiyanoehua timiyaniija! ⁴⁴ Shusha cua tojishacari quiajaniya cua sequeyano, cua mueyari cua jiniacuma nujuaneguequee na shuquiriniutia. ⁴⁵ Shuquiriaatia quia quiri, quia tiuuniucua Pueyaso sequesanoocua quiajaniya.

⁴⁶ Maríari sequeree:

—¡Coojia jiyanoehua shuqiritiaa cua Jiyaniija Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua najuhua quijianija. Naajaa, Pueyasoori cua jiyanoorii. Cua saquiriojorucuaari na tojijia cua quishacari. Quiarijiani, pueyari pueyaracaanu cua sequenutaniya: “Pueyaso shuqiritiasano María”. ⁴⁹ ¡Pueyasoori jiyanoehua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰ Nojuajaari pueyaracaanu jiyanooquiaa na tojitianaa, canapuate na rerequeteyaquijiacacuajani. ⁵¹ ¡Nojuajaari jiyanoehua maninia miiquiaa na cumaacata! Nojuajaari niishijiaca pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. ⁵² Nojuajaari cutara jiyaniijianucua jatatee, cuno pojori jiyaniishano niishiyashijiaca pueya jiyatesaanura jiyaniijiara nojori niti saniniuujia. ⁵³ Miaajeejunucua tootjioreeri maninia sumatuuta. Puera casamiriaca pueya taanuuquiaariiri,

casaju nojori quiojonura. ⁵⁴ Na pueya Israel naacureeri. Majaari na niyajetanu quiquiaari nojoriicua na taraajenu. ⁵⁵ Naa miiquiaariiri taa na sequequiaari pa supuetanaacujani. Pueyasoori naa pa supuetana Abraham sequequiaari: “Seetanujuanaa quiocua taraajenutaniyanijia, quiocuajinio supueriquiano pueyacuanio”.

⁵⁶ Na nuhuaji, Maríari queraatia tarishiquiaari Isabel tiajinia. Jiuujianaraca raca nuhuaji, Maríari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na shuriucua quiniaa, mariyata na jiyasoocujinio supueno pueyajuahaj, nojoriiri jiyanoehua shuquiriquiaari nojori tojishacari taa Pueyaso jiyanoehua taraajequiaari Isabelcuani, na shuqiritiniuria neyanuta. Nojoriiri Isabelta shuquiriquiaarijuhuaj. ⁵⁹ Nojoriiri Zacarías tiajinia rerejoquiaari conaaja jiiitasacari ocho juuca, na cararaatiuuquia co mialesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰ Na nucuaari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura taa na sesojonu paniriquiaa neyanuni. ⁶³ Zacaríasri naajiooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee!
⁶⁴ Jiyacaritij, Zacarías nitiiri sasaquitiacuhua. Juhuacatecara pocuarohuari. Pueyaso miishano pohuateree pueya niquiaraari, na shuquiritiasacari Pueyaso. ⁶⁵ Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhuacua quijiaca pueyara. ⁶⁶ Puetunu nio tojitianaa pueyajanaari niishiriojonuuquiaari. Tama nojorijiaarijia nequesoreetooquiaari:

—¿Casaaquitijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuaanaa cuno mueyata quiriquiaa, na cumaquiniuria.

Zacarías sequesano na shuquiritiasacari Pueyaso

⁶⁷ Na que Zacarías jiuujiaari jiyanoehua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

⁶⁸ —¡Jiyanoehua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanoehua shuquiritiasaaria mijiria na niniuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David

niquiohuacuajinio rasaanutaniya, taa Pueyaso sequequiaari tariucuacaanucujani. ⁷⁰⁻⁷¹ Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niquiniu paniyaquijia pueyano. ⁷² Nojuajaari sequequiaarijuhuaj, majaari na niyajetanu quiniutianiya na sequesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijuhuaj maninia quijiara pa jataniniutianiyaquinaari, saaja nera pa quiniuria pueyaracaanu. ⁷⁶ Quiajaniya saniniuujia, quiyanuniyojuanaa, quiaari sesojosaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquirojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jiyanohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa

rucuanenonura Pueyaso niqiuara, panaatia poojiacata. Naacuaajitij, majaari socua pa cajitiuniu quiniutianiya taraatia ninishiQui, juhua pa jamaca shuriucua.

⁸⁰ Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaariijaatijia narta Israel pueya niqiuara.

2

Jesu rasacari (Mt 1.18-25)

¹ Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jiiatasano pueyapuejanaa cuara serojosaaria puetunu nojori jiyacajiniajanaa. ² Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijiaara César Augusto jiyatesano quiquiaari. ³ Puetunu pueyajanaari sequesaaquiaari nojori cuara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. ⁵ Maríari tari

sequesaaquiaari nojuaja Joseeta caminiutianiya. Naaratej, Maríari nata quiaquiaarijuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. ⁶ Belén tiacajinia nojori quishacari, jiyacari tari quiquiaari María ranu juuca. ⁷ Tii jiyapueratereeri. Conaaja jiunioquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria ruconaa tiuquijia tiajinia.

Pueyaso seya muetasacari borrego cojuanaa pueyacua

⁸ Belén tiaca shuriucua cuno niucujaja, borregohua cojuanaari suteriquiaa cuhuariquiajinia, na seya nojori cojuasacari. ⁹ Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanohua shiriiquitiurii! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanijia, jiyanohua maninia casaa cua pohuatanura niajaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. ¹² Niaa jaara nocua quiaare, niaari conaaja riuriatanutianiya toqueraacuacajinia jiunio-cosano, juyaca miaquejajinia maano. Naacujitij, niaari niishiniutianiya, seetanujanaari cua pohuatasano niajaniya.

¹³ Jiyacaritij, narta Pueyaso seyari na cojishii. Jiyanohua queraatia quiriquiaari. Nojoriiri naa maniniuhuaqueetariquiaa Pueyaso:

¹⁴ —¡Jiyanohua maninia pa Pueyaso, jiyocuacaanu Quijia! ¡Nojuajaari jiyanohua pa shuquiritiasano, na jiyaronuucua jiyacua quiniaa Jiyanoonia! Naacuajitij, cana Pueyaso shuquiritiaani, nojoriiri jiyanootioonutaniya narta pueyata.

¹⁵ Pueyaso seya jaara tacataquiaariuhua jiyocuacaanu na quiquiojiniohua, borregohua cojuanaari tama sequetooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree panyacujani!

¹⁶ Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. ¹⁷ Nojori niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriquiaani, nojoriiri jiuujiateree. ¹⁹ Majaari María niyjetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuri. ²⁰ Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojojua tiajinia, Pueyasora jiyatesocoriquiano

²¹ María conaaja jaara ocho juuca jiiitiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacuajani, na manajeyaquishacarijia.

²² Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miiquiaariti, tariucuacaanu Pueyaso Rupaajinia naajiotasano tojitiajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. ²⁴ Naaratej nojoriiri quiaaree na seru mosaanura nojoriicuara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinijia”.

²⁵ Jiyacariti, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miihia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyaroora Israel pueyacuaji Tacuriquiano.

Nojuajaari Pueyaso Sohuanu jiitiaja. ²⁶ Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷ Pueyaso Sohuanuuri na jiyatequiaari namitia cuno juuca Pueyaso Secojojua tiajiniara. Naacujitij, Jesu jaara pasaaquiaari Secojojua tiajina, nera na miishaanura puetunu tariucuacaanu rootasanojuanaa, Simeónri jiyacari tii na niquirii. ²⁸ Simeónri Jesu paree. Na cacanuureeri. Naa Pueyaso sequeree jiyanohua na shuquiriniutiaari:

²⁹ —¡Cua Jiyaniijianaa, tariucuaja! ¡Quiarijia cutara cua naata casonu juhuajaniya, shuquiriaatia cua quishacari! Quiaacuajaari tari cua niquitirii tarijia quia sequesano janiya, quia seru cua quiniuucua. ³⁰ Tari niquirii quia Jiyarosanocujaniija, canaacuaji Tacuriquianoni. ³¹ Nojuajaari quia niquitiosano puetunu jiyacajinia quiniaa pueyapueecuarajanaa. ³² Nojuajaari puetunu taucuaca jiuujiajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasaca pueya shuquiritiasano quiniutianiya na seera.

³³ Jesu que, na nucuajuhuj, nojoriiri jiuujiateree naa Simeón sequesacari conaajajiniji.

³⁴ Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucua María sequereejariuhuj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵ Naacuajitij, tama pueya niishiriojosano noojiacajiniajaarijia niishishaanutaniya. Quiara saniniuujia, jiyanojua taraatiaari quiniutianiya. Quioojiaari juhua mueruuta tohuariquiritishaanutaniya quia mueyacua quia miishacari.

³⁶ Cuniqijia, Pueyaso Secojojua tiajiniani, tamonu motajaari tii quiriqiaajuhua. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niqiuohuacuajinio supueno maaji quiquiaari. Jiyanojua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojojua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secojosacari pueyaracaanu. ³⁸ Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari

cante nojuajani. Cunora, Pueyaso sequeree na shuquiriniutiaari: “¡Paacarashol!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiaca pueya niquiara. Nojori sequereeri:

—¡Niocujaaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniohua

³⁹ Jesu queyari puetunu Moisés naajioneejinia Pueyaso rootasanojuanaa tucuataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuaaja, Nazaret tiacajinia. ⁴⁰ Naatujua Jesuuri maashiquiaari. Socua cumueecara quiquiaariiri, maninia niishijiaranio. Pueyasoori jiyanoehua na naacujua.

Mashajaniyojua Jesu quishacari Pueyaso Seco-jojua tiajinia

⁴¹ Puetunu marijiajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jitiquiaaricuajani puetunu marijiajanaa. ⁴³ Queranacunuunu jaara puequequiaari, Jesu queyari quiojoriqiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariqiohuajuhuj. Naacujitij,

nojoriiri juhuajaniya rucuaneree puetunu cuno juucajanaa. Cuno niucuja, nojoriiri Jesu pajequiaari nojori pueya tajinia, nojori niishishano pueya tajinianio. ⁴⁵ Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojiniji niishitiojona pueya tajinia cajiyano. Nojori tojiriquiaari. Nojori nequesoreetariquiaaariuhuj. ⁴⁷ Puetunu pueyajanaa, canapuete na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriqiuquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyanohua canaa tacaaniutia quiocua!

⁴⁹ Jesuuri na riuquaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoua tiajinia quiniuucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijia quiquiaarijiaariuhuj. Pueyaso

shuquiritiasano quiquiaariiri. Puetunu pueyajaanaari na shuquiritiaquiaarijiuhuj.

3

Tiuquinijiona Juan pahuatasacari Pueyaso rupaa cariquia jiyajinia

(Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pahuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijiajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaaahua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucuaara César Tiberio jiyatesano quiquiaari cuno jiyacajinia. ² Jiyacaritij, Anásri Caifásta Judiocuacaacuara secojonaa jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquioco jiyacajanaa tajiquiaari na poojotasacari Pueyaso rupaa pueya niqiara. Nojuajaari naa pahuataquiaaritij:

—¡Nioojia nia tacatore maja socua sesa nia miniuria, moojinia cua tiuquinijionura niajaniya,

Pueyaso jiyanooniuria niajaniya sesa nia miishanojiniji!

⁴ Naacuaajitij, supuetana Isaías naajiotasanoori tohuateequiaari. Pueyaso sequenu panishano caminiujiunia na quiniuucua, nojuajaari naa miriqui naajiotaqueiaari supueriquiano Juanjiniji:

“Pueyano rupaari tojishiya cariiquia jiyajinia nacaano. Sequeyari: ‘Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria! ⁵ ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhajanaa cuaara jiuurioosaaria jacananu na nuu quiniuria! ¡Shuyorocotunu nuu cuaara pocuareesaaria! ¡Puetunu surocoshiquiajanaa cuaara mishiquiojosaaria jacananu na nuu quiniuria! ⁶ Naacuaajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanooni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaqueiaari:

—¡Niaacuaajaari juhua sacocua! ¿Cante nia numooteree nia mashiniuria jiyanoohua Pueyaso

saniitionu panishacari niajaniyani? ⁸ ¡Maninia mi-
ijiara nia quiri, canaa niishiniuria niaari seetanu-
juanaa nioojiaca tacatoree sesa nia miiniuujiniji!
¡Majaari najuhuana tama nia cuaqueyajaaja nia se-
quenu: “Pueyaso pueyanonijia, supuetana Abra-
hamjinijinio cua supuenuucua”! ¡Nia niishiri,
Pueyaso jaara paniri, nojuajaari na naata nio
saijiniji shipininiu Abraham niquiohuarajuhua!
⁹ ¡Pueyaso cajiiri tari mataa naana pajama, sesa
naana nuujutajara! Naana jaara sesa jajau mue-
tujua quiri, nushiyari catijasocoriquiano. Naa-
juhuaj, niajaniyari juhua sesa muetuna naana,
maninia miyashijia nia quishacari. ¡Niaari quera
saniitioshiyacaja!

¹⁰ Naaratej, pueyari Tiuquinijiona Juan neque-
sotaree:

—¿Taa canaa miyarinitioj?

¹¹ Juanri nojori riucuaaree:

—Cante querajaqueya toqueracani, nojuaja
cuaara niquitioora taque cante toqueejuni.
Naajuhuaaj, cante miaquesanoracani, nojuaja
cuaara niquitioora miaquesanoojunucua.

¹² Roma tiacajinia quijia jiyaniijiajanaa Césarra
cumaneeca masejonaari Tiuquinijiona Juancua
nijioquiaarijuhuaj. Nojoriiri tiuquinijosano
quiniu paniriquiaajuhuaaj. Naaratej, nojoriiri
Juan nequesotaree:

—Niishitiojonanaa, ¿canaarijataj, casaa canaa
miyarinijia?

¹³ Juanri nojori riucuaaree:

—Maja puera cumaneeca nia masenu pueya-
jiniji. Saaja nia jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarini-jia?

Juanri nojori riucuarree:

—Niaacuajaari puecootajaraca. Naajaa, ma-jaari pueya casami nia jaariutianu, nojori nia miananajonuta, nojoriicuara nia tonujusacariji-uhua nia sapojonuta. Juhujaniya nia quiri saaja nia jiyaniijia niquitiosano cumaneecata.

¹⁵ Pueyari jiyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niqiniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuaaanu Pueyaso sequesano na Jiyarosocoriquianotej. ¹⁶ Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohanu tiuquinijionutaniya nioojiajinia, na cumaaca nia jitianura, seetanujuanaa maninia miijia nia quiniuria! ¡Nojuajaari juhua manitia nia saniniujiuniutianiyajuhuj, maninia jiuujaraca nia quiniuria! ¡Nojuajaari socua jiyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaja taa pueyano miiquiaa na trigoni paratu panura na cocua, na sucuanio,

saniniuujia na jajau na racatasocoriquiano tiajiniaaco. Naajuhuj, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jataasaanutaniya manijinia! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹ Jiyaniijia Herodesri jiyacari tarajanu Felipe niquiocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojiniu quiquiaari saaja. Jiyaniijia Herodesri socua queraatia sesa casaa miiijia quiquiaari. ²⁰ Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

Jesu tiuquinishacari moojinia

(Mt 3.13-17; Mr 1.9-11)

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijihuhuj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. ²² Pueyaso Sohuanuuri Jesuucua roseyaree juhua mococoonu niquishano. Jiyocuacaanuji, Pueyaso rupaari tojishaaree sequeyano:

—¡Quiaacuaajaari cua panishano quiyanuniyojua!
¡Jiyanohua quía shuquiritiaanijia!

Jesu supuetanaa sesaca

(Mt 1.1-17)

²³ Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu

quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari.

Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui cariiquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri.

³ Jiyacaritij, Sesaacaari na sequeree:

—Quiaa jaara seetanujanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucuaare:

—Pueyaso Rupaajiniaacuajaari naa naajiotasano quiya:

“Pueyanoori maja saminio na quiniu saa mi-aquesanotaja. Seetanujanaa saminio quiyari na tojishacari puetunu Pueyaso Rupaa-janaa”.

⁵ Na nuhuaji, Sesaacaari Jesu jiyataaree jiyanohua jiyaconaja tuhananuucua. Sesaacaari ritia niqitirii Jesu puetunu mijiria jiyacajanaa.

⁶ Jesu sequereeri:

—Janiya quia niqitionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqitiosaaquiaarini.

Naacuajitij, janiyari cumaaca niqutioquiaani cana cua niqutionu paniyacujani, jiyaniijjara na quiniuria. ⁷ Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijja Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoja tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara see-tanujuanaa Pueyaso Niyanu quiri. ¹⁰ Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹ Nojoriiri quia quianutaniya, saajiaacua quia jiriataaquiniuucujaji”.

¹² Jesuuri na riucuarree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijja Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijja na tarinitiaquiaari tamacaririaari.

Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

14 Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari.

15 Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

16 Jiyacaritij, Jesuuri quiaquiaari Nazaret tiacajinia, tee na canashitishaaquiaaricujani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucujani. Nojuajaari nujuaquiaari Pueyaso Rupaa serojonura pueya niquiara. 17 Pueyari na niqitioree tariucuacaanu Pueyaso sequesano caminiujiunia Isaías naajionee jiuniocosano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacujani:

18 “Pueyaso Sohuanuuri coojiajinia quiyani, na cumaaca cua jiitianura. Naacujitij, Pueyasoori cua seeratarucuaa maninia rupaa cua pohuatanura casamijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacujitij, nojoriiri cartesano quiriohua Sesaaca sapojosojiniji. Cua jiyaroreejaariuhua cariyojuarujuri pueya namijiaa cua jeecanura, maninia niquijara nojori quiniuhua. Cua jiyaroreejaariuhua

taraatia miitiasusano pueya cua jiyatenura shuquiriaatia quijiacara. ¹⁹ Cua jiyaroreejaariuhua cua pohuatanura pueya niquiara, quiariijaari Jiyaniiija Pueyaso jiyanooshacari pueya”.

²⁰ Na serojonu nuhuaji, Jesuuri naajionee jiuuicorohua. Na niqutiorohua na cojuanaari. Jesuuri cajiriohua. Puetunu pueyajanaari tacuritia na shootiaturiquiaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajio-tasanoori tari tohuateeree nia niquiara.

²² Puetunu pueyajanaari jiuujiaterree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijaariija nequesoreetooriquiaa:

—¿Majate nio pueyano José nianucuaaja, niya pa tiacajinia maashiniotej?

²³ Jesuuri nojori sequereeri:

—Niaa jiyoteeri cua sequenu paniya nio tariu-cuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajaajani, taa nia tojiquianucuaaja cua miishanojiniji Capernaum tiacajiniacuaani.

²⁴ Jesuuri socua sequereeri:

—Seetanujuanaa nia sequeyanijia, puetunu Pueyaso sequenu panishano caminiujiu-niaajanaari tojishoo quijia, tama nojori tiacajiniaajaaja. ²⁵ Supuetana Elías quishacari, queraatia mashiopueeri quiquiaari Israel jiyajinia. Jiyanohua miaajesacari quiquiaariiri

maru niyaquishacari pueyaracaanu. Jiuujianaraca marijiaari shocojoquiaari socua seis racanio, maru niyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasoocua tiuujia, cuno taatu miaquesanoori maja na pueetanu quiquiaari nojoriria. ²⁷ Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiiitasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

²⁸ Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanohua juaaquioree. ²⁹ Nojoriiri saneecuatuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricua-jani. Nojoriiri na capotunu paniriquiaa juucua tacojiyaji naa na monura. ³⁰ Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

*Samaruraca pueyanojiniji pohuatasano
(Mr 1.21-28)*

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujunia.

³³ Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanohua nacareeri:

³⁴ —¡Nazaret tiacajinijinio Jesunaa! ¿Taa quia mi-iniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajanijia, cante quiajaniani! ¡Quiaacua-jaari sesa miyashijia Pueyaso Nyanu!

³⁵ Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano.

³⁶ Puetunu pueyajanaari shiriiquitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanohua cumaacaraca! ¡Cunora samaruhua tohuataniriiri!

³⁷ Puetunu cuno jiyajiniajanaa, Jesu miishanojinijiiri caminiujiushaquiaari pueya niquiara.

*Jesu naatanishacari Simón Pedro reyarucua
(Mt 8.14-15; Mr 1.29-31)*

³⁸ Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jiyanohua naseeca matariquiaa. Pueyari Jesu sequeere na naataniniuria. ³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotucaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia ni-aquiaari puetunu cusosuhuacuajanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹ Naajuhuj, queraatia samaruhuari tohuareetaquiaari cusosuhujajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso sejonuujua tiajiniaqueya
(Mr 1.35-39)

⁴² Tariquiicujaji, Jesuuri tiacajiniji quiaquiaari tamaquiicua tamajaaja. Pueyari na pajequiaari. Nojoriiri socua nocua tiuquiiioquiaari na pajenuusacari. Majaari nojori cartenu paniniu

quiquiaari Jesu quianura cuniquiji. ⁴³ Jesuuri nojori sequeree saaja:

–Janiyari jiyarosaaquiaarini pueyapue niquiara cua pohanatunura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiuushacari nocua. Naaratej, janiyari na rupaa pohanatunura quianu paniya tamonu tiacajiniyajaniuhuj. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiocuaca jiyajiniyajanaa rucuanajoquiaari Pueyaso rupaa pohanatunura puetunu Pueyaso secojonuujua tiajiniaqueyajanaa.

5

*Sapitiaajara jaqueroootanaa shiriiquitiushacari
(Mt 4.18-22; Mr 1.16-20)*

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohanatariquiaa. Puera jiyanoohua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaaree:

—Niishitiojonanaa, canaacuajaari tari jaque-rootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaque-rootarohuacuaraquij.

⁶ Nojori jaara socua na shiyaruhua jartaquiaariuhua, jiyanoehua queraatia sapitiaaja ritiatureeri! Shiyaruhuari sureequetanu coteequiaari. ⁷ Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoririatej, Jesuucuaara mojoquetareeri. Jesu sequereeri:

—¡Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

⁹ Simónri shiriiquirii, jiyanoehua queraatia sapitiaaja nojori quiasacari. Nata quiniaa pueyari shiriiquitiuriijuhuj. ¹⁰ Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu
(Mt 8.1-4; Mr 1.40-45)*

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

Naa na sequesacaritij, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niqutishii quia cuaqueya, na cartenuhuara quiajaniya, pueya tajinia quia rucanejonuhuara juhuajaniya. Naajuhuj, quia seru quia niqutiosesee Pueyasooacara catijasocoriquiano. Naa quia miiri taa Moisés rootaquiaaricujani, puetunu pueyajanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanohua socua tamaquicua caminiujiushaaquiaari pueya niquiara. Naaratej, jiyanohua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji.

¹⁶ Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhuana cusosu
(Mt 9.1-8; Mr 2.1-12)*

¹⁷ Tamonu juuca, Jesuuri pueya niqiuara niishitiojoriquiaa. Na tojitianaa tajinia cajitiuriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijijianaa, Judea jiya tiacajiniji, Jerusalén tiacajinijinio. Jesuuri jiyanohua Pueyaso cumaaca jiitiariquiaa cusosuhua na naatanijionura. ¹⁸ Jiyacaritij, socua pueyari tiuquiiijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa

na miishanojiniji! ¡Saaja Pueyaso cutaraari na naata pa jiyanooni!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? ²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”? ²⁴ Cunora, janiyari quiarijia nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

²⁵ Jiyacaritij, pueyanoori saneequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta. ²⁶ Puetunu pueyajanaari shiriiquitiurii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijiuhuj:

—¡Paari quiarijia jiyanohua maninia miishano niquiriini! ¡Nocuaji jiuujiatesano!

*Jesu sequesacari Leví, na pueyano na quiniuria
(Mt 9.9-13; Mr 2.13-17)*

²⁷ Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jítiasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jyanohua queraatia sumatuquiaari na tiajinia, Jesu na queranacutamura. Queraatia narta cumaneeca masejonaari tii quiriquiaajaacuhuj. Nojoritia miaquejajinia cajituriquiaari, socua tamasaca pueyano.

³⁰ Moisés Rootasanojiniji niishitiojona, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajajanio? Nojoriiri pa paraa sequera cumaneeca masejona.

³¹ Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya.

³² Naajuhuj, majaari mijiria cua ninu quiquiaari maninia miiija pueyacu. Niquiaari cutaraniija sesa miiijaca cua tacatonuhua Pueyasocua, maninia miiija nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori

*secojonura**(Mt 9.14-17; Mr 2.18-22)*³³ Pueyari Jesu sequeree:

—Tiuquinijona Juan pueya cutaraari sequayarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuj. Quia pueya saniniuujia, saaja miaquequiaari, ratuquiaari. ¿Casaarateni?

³⁴ Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niquiara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua rupaari naajuhuj, juhua quiarinio toque. ³⁷ Naajuhuj, majaari na naata quiariniacu uva caaca mishinishaanu shoque tariucua-cojiniya, tariucua shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitiashiya. Shoqueeri najuhuana sesoshiyajuhuj.

³⁸ Naaratej, maninia cutaraari quiariniacu uva

caaca shuujionu shoque quiariquiojinia, maja vino niitiasaanuucuaaji, na quiquio shoquenio. Naajuhuaaj, nia niishitiojosanoori juhua tariucuoaco shoque. ³⁹ Naajuhuaaj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuaaj, majaari cua niishitiojosano nia paniniu, quiarinio na quiniuucua.

Jesu pueya carojotasacari trigo samaatenu juuca
(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na corequetanura. Na nuhuaaji, na jajau miojonuuriquiaari. ² Fariseocuacaari na niqitiariquiaa. Nojoriiri Jesu pueya juaarii:

—¿Casaara nia tojitiaaquiya Moisés Rootasanoni, taa na sequequiaaricujani maja pa poonijionura samaatenu juuca?

³ Jesuuri nojori riucuaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijuhuaaj?

⁴ Nojuajaari Pueyaso Secojojua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhuaaj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari.

Majaari Pueyaso juaaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacujaari Pueyaso Jiyarosanoni. Jiyani-ijiara jiyatesaaquiaarinijia cua sequenura casaate samaatenu juuca miishiyani, Pueyaso pa shuquir-itiniuria.

Jesu jeecasacari pueyano juaashiquia, cuseetucojuara joojequetano

(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojoua tiajinia tiuquiaaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara. ⁷ Moisés Rootasanojiniji niishitiojona, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeecare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. ⁹ Jesuuri nocuara tonujunu panijiaca pueya sequeree:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaa-janaa niquinijoree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! ¹¹ Cuno pueyari jiyanohua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano

(Mt 10.1-4; Mr 3.13-19)

¹² Jiyacaritij, Jesuuri tamonu tuhananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. ¹³ Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaaquiaarijuhuaj, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya

(Mt 4.23-25)

17 Na nuhuaji, Jesuuri tuhuananujiniji rosetaquiaariuhua na saquiriojosano pueyata, jamatujiniara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanohua queraatia pueyari tii quiriquiaa puetunu Judea jiyajinijinio, Jerusalén tiacajinijiniojuhuj, shoniniacu caminia shuriuquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijiosaaturajuhuj. Jesuuri nojori naatanijiooree. 18 Naajuhuj, taraatia samaruhua miishano pueyari naatanijiosaaquiaarijuhuaj. 19 Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanohua poonijioriquiaa. Naaratej, puetunu pueyajanaari naatanijiosaariquiaa, saaja nojori quiasacari nojuaja.

*Jesu pohuatasano shuquiriaatia quijiajiniji,
taraatia quijiajinijinio
(Mt 5.1-12)*

20 Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara ni-
ishiriquia nioojia saaja sesa miihia. Niaa jaara
niishiri nioojia naa quiyatej, niaari Pueyaso jiiti-
asano pueya quiniutianiya.

21 'Niaari Pueyaso shuquiritiasano, niaa jaara maninia miihia quiniuucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniuucua jiaatiaa, Pueyasocua-jaari nia jataniniutianiya maninia quijiara nia quiniuria.

'Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

22 'Niaari Pueyaso shuquiritiasano, pueya jaara nia niquniu paniyaquiri, pueya jaara nia taanure, pueya jaara nia macaatiri, pueya jaara nia soore cua tojijiaca nia quishacari. 23 Niaa jaara naa miishaaretej, jiyanoohua nia timiri. Nia jaacutare nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiihia jiyocuacaanu, na niqutiosocoriquiano niajaniya. Nia paraa supuetanaari naa taraatia miiquiaari tariucua-caanu Pueyaso sequenu panishano caminiujiuniaa pueyajuhaj.

24 'Niaari saniniuujia taraatia quijiaca quiniutianiya, jamuejaca casamiriaca pueyanaa. Ni-aacuaajaari tari shuquiriaatia quiquianu, puetunu nia panishanojuanaa nia jiihiasacari.

25 'Taraatia quijiacaari niajaniya, cante sequejani: "Janiyacuaaja maninia pueyanoni. ¿Janiyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiacaari niajanijajuhuaaj, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

²⁶ 'Taraatia quijiacaari niajaninya, puetunu pueyajanaa jaara maninia pohuataquiaa niajanijajiniji, maninia nia cojiniuucua cuno pueya, Pueyaso tojiyashijiaca pueyani. Cuno pojori supuetanaacuajaari naa shuquiritiaquiaari cuno sapojonuujuaca, canapuate maja seetanujuanaa Pueyaso sequesano caminiujiuniaa quiquiaaricuaiani.

Pa paraa panijiaca pa quirij
(Mt 5.38-48; 7.12)

²⁷ 'Niajaninya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niqiniu paniyashijia pueya. ²⁸ Saaja maninia nia riucua nia juayano pueyano. Sesa nia miijiaca pueyacuara nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijihuaaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqitiorejuhuaaj. ³⁰ Pueyano jaara quia sequere quia casamijiniji quia niqitionura nojuaja, quia niqitiore nareja. Pueyano jaara quia casaa jaariutiare, majaari na sequenu: "Cua niqitiorohua". ³¹ Maninia nia miiri tamasaca, taa nia paniquiaa tamasaca miiniuria niajaniyacuaani.

³² 'Niaa jaara saaja nia panijiaca paniriqquia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiacajuhuj. ³³ Maja puera maninia miijia nijaniya, niaa jaara maninia mi-iquiaa saaja noo pojori, canapuate maninia mi-iquiaa nijaniyacuaani. Sesa miijiaca pueyari naa maninia miiniu niishi-quiaajuhuj, noo pojori canapuate maninia miiquiaa nojoricuaani. ³⁴ Maja puera maninia miijia nijaniya, niaa jaara nia masena niqutioquiaa na panishano, nia ni-shishacari nojuaja ritia niqutionutaniuhua nijaniyajiniji na masesano casaa. Sesa miiji-aca pueyari na casaa rupaquijiara niqutioquiaa narta sesa miijia pueyajuhuj, na niishishacari nojori ritia niqutionutaniuhua nojori masesano casaa rupaquijiara. ³⁵ Nia paniri nia paraa. Maninia nia miiri nojori. Nia casami nia niq-uitiore nareja, pueya jaara na paniya rupaqui-jiara. Majaari nia taraajenu cuno pueyano jaara nia niqutioyaquiriohua nia casaa. Naa nia mi-ishacaritij, niaari seetanujuanaa Jiyocuacaanu Quijia muerasu. Pueyasoori socua jiyanohua queraatia nia niqutionutaniya tamasaca nia niq-uitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutio-joquiaa sesa miijiaca pueya, mariyata canapuate na sequeyashijiacani "paacarasho". ³⁶ Naaratej, jiyanootio nia quiri, taa nia Que Pueyasocuaani, jiyanoojia.

Maja sesa nia niishiriojonu niarta

*pueyanooocuara**(Mt 7.1-5)*

³⁷ 'Maja nia rimiaaquenu tamasacaacuara, Pueyaso mariqui saniniuuja nia jiyanoyaquiriiri. Niaa jaara tamasacaacuara tonujiyashijia quiri, naajuhuj, Pueyasoori maja na saneenu quiniutianiya sesa nia miishanojuhuaj. Niaa jaara jiyanootio quiri, Pueyasoori nia jiyanooniutianiyajaacuhuj. ³⁸ Niaa jaara tamasaca niquitioquiaa na panishano, Pueyasoori naa nia niquitionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajiniaja niquitionutaniya niajaninya, taamueca shanacutajajinia nia niquitioquiaa pueyacuaani.

³⁹ Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

⁴¹ ¿Casaara nia niquiya rucucua maano quia tarajanu namijiajiniani, niaa jaara puereetuca maca jiiitiaa tama nia namijiajiniajaaja? ⁴² Niaa jaara puereetuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno

rucucua pa taquiri quia namijajiniji”? Sesa jiuujiaracanaa, tama nia namijajinijijiaaja nia pare coteenu cuno maca. Na nuhuaji cutara nia naata maninia niquiniu, cuno rucucua nia taquiniuria nia tarajanu namijajiniji. Naaratej, majaari nia rimiaaquenu niarta pueyanoocuara.

*Naanaari niishishano na jajaujiniji
(Mt 7.17-20; 12.34-35)*

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu.
⁴⁴ Puetunu naanajanaari maninia niishishano na muetusanoiniji. Majaari pa naata satuna carojonu shuuniajiniji. Naajuhuj, majaari pa naata tuhuaracona carojotanu saarianajiniji.
⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojajiniani, paari cuno pocuaani.

*Miriqui Jesu pohuatasano cumueeca jiyajiniji,
sasaca jiyajinjinio
(Mt 7.24-27)*

⁴⁶ ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa? ⁴⁷⁻⁴⁸ Cua tojiri. Cante cua rupuenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujia. Na

nuhuaji, moo jaara pajaashiquiaari, pajaacaari jiyanoehua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiucua quishacari cumueeca jiyajinia. ⁴⁹ Saniniuujia, cante najuhuaa cua niishitiojosano tojiyaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanoehua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru (Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ² Romano soldadoehua capitánri quiniqui quijia quiquiaari. Jiyanoehua na panishano seruuri cusos matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuara niiria nocua na seru na naataniniuria. ⁴ Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanoehua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, ¡nojuajaari jiyanoehua maninia pueyano! ¡Quenaaja

quia miiri na panishano! ⁵ Nojuajaari parta Juddiocuaca panijia. ¡Nojuacuajaari Pueyaso secojojua tiatequiaari canaara tama na cumaneecatajaaja!

⁶ Naacujitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷ Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸ Janiyari niishiyajaaniuhuj, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadohua jiitiaajuhuj. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyanjia quiaari jiyano cumaacaracajuhuj”.

⁹ Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquinijioree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, ¡majaari

quenaaja cua niquniu quiquianu Pueyasocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia tamasaca pueyano. ¹² Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. ¹³ Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequeree:

—Mashajanaa, janiya quia sequeyani: “¡Quia sanere!”

¹⁵ ¡Macuuri cajiquii! Juhucatecara pocuareeri. Jesuuri na nucuaacua na jaatucuree. ¹⁶ Puetunu pueyajanaa jaara naa Jesu miishano niquiquiaari, jiyanoehua pueretureeri. Nojoriiri Pueyaso shuquiritiaree jiyanoehua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanoehua cumaacaraca!

Nojoriiri naa sequetureejuhuaaj:

—¡Pueyasoori shusha quiarijia na saquiriojosano Israel pueya niishiriohuacuhuaaj, na cumaquini-uria pajaniya!

¹⁷ Jesujiniji pueya pohuatasanoori caminiujiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaanio.

Tiuquinijiona Juan jiyaramiquishano pueya nequesoreesacari Jesu

(Mt 11.2-19)

¹⁸ Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucuacaanu sequesano niriquianotej, tamonute sashishiyajaara soj?”

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriquianotej, canaate tamonu sashiyajaara soj?”

²¹ Nojori tiuquiiijosacari Jesuucua, jiyacari-tij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyanio. Mariyata queraatia cariyojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequere:

—Nia quiaarohua. Tiuquinijiona Juan nia pohuatasuhua taa nia niquiriicuajani, nia tojishanonio. Nia sequesuhanoj: “Cariyojuarujuriiri niquijiacara quiriohua. Shipiiniuquiujuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhuara. Numueejunucuaari tojijiacara quiriohua. Macunucuaari samiitianijiosaarohua. Casamiijiuniucua pueyari Pueyaso rupaa pohuataaaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴ Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niqiniuucua nia quiojocanu cariiquia jiyajiniani? ¿Niaate noojia niquijioteja niqiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarajosano? Majaruhua. ²⁵ ¿Casaa niqiniuucua nia quiojocanunitioj? ¿Niaate maniniuqui toque cushijia niqiniuucua quiojocanu? Niaacua-jaari niishiya, shanohua toqueya cushiyonuujuacaari saaja jiyaniijianucua tiajinia quiyano niquishano. Nojoriiri tama na panishanojuajaa mijjiaca. ²⁶ ¿Taateerinitioj? ¿Casaa niqiniuucua nia quiojocanuurini? ¿Pueyaso sequenu panishano caminiujiuniate quiquianu? Taaquiriirinij. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiuniajinijijiana. ²⁷ Cuno Juanjinijicuaajaari tariucuaaanu Pueyaso Rupaajinia

naajiotasano quiquiaari. Pueyaso sequesano no-juajiniiri naa naajiotasaaquiaaritij:

“Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujuniaajinijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ 'Puetunu pueyajanaa, mariyata cumaneeca masejona Roma tiacajinia quijia jiyaniijarani, nojoriiri niishiquianu Tiuquinijiona Juan pohuatasano Pueyasojiniiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

³⁰ 'Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhuaaj. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

³¹ Jesuuri socua sequeree:

—¿Quiarijia nio pa quishacari pueyarijiaataj?

³² Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia

cajitiucuaa curotasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniujuhuaj”. ³³ Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niqianuni. Janiyari saniniuujia miaquesano miaquejojuani, vino ratujuajuhuj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojitiaaquiyajaacuhuj. ³⁵ Naajaa, pueya jaara canaa pohuatasano tojiijaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojiijaca jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masu-uquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri. ³⁷ Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhuaj. Shiitianiyojua seesariquiaja pataconiyojua

cacatariquiaari, cohuaja saajiajiniji quejasano. Mishaja quiriquiaari shanhua jaanutajata.

³⁸ Maajiiri Jesu cashacuucuma mojuquetasee. Nujuqueriquiaari. Na namijaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanhua jaanutaja totaree Jesu niohuacaacuaari.

³⁹ Cuno Fariseo pueyano niquishacari naa cuno maaji miishanotej, noojiajina niishiriojoriquiaari: “Jesu jaara seetanujuanaa Pueyaso sequenu panishano caminiujiunia quiri, mariqui niishiri cante na coyani, taamueca maajitijianojoni”.

⁴⁰ Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari rupaquijiara tamonu cumaneeca niquitiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano.

⁴² Na nuhuaji, nojori sequesano juuca jaara tari quiquiaari na camaru nojori niquitionuhuaara na cumaneeca, majaari nojori jiitianu quiquiaari cumaneeca. Naaratej, cumaneeca niquitiojonaari nojori sequeree: “Naajaa, maja socua nia niishiriojonu nia niquitionuhuaara tarijia cua

niquitiosano cumaneeca niajaniya”. Cumaneeca niquitiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niquitiojona panijara quiniutianiyani?

⁴³ Simónri Jesu riucuaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequeree:

—Taaquiririnij.

⁴⁴ Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajina, majaari quenaaja quia niquitionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari. ⁴⁵ Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari.

⁴⁶ Naajuhuj, majaari quia totanu quirii muesu nunacu cua nacaacua. Nio maaji cutaraari cua niohuacaacua totaree shanohua jaanutaja.

⁴⁷ Naaratej cua tojiri. Nio maajiiri jiyanohua sesa miiija quiriquiaa. Naaratej, jiyanohua cua paniyari puetunu sesa na miishanojinijijianaa cua jiyanooniuucua nojuaja. Saniniuujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiuanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

8

Jesura pueraquena maajipohuajiniji pohuatasano

¹ Na nuhuaji, Jesuuri rucuanajoquiaari queraatia tiacajinia, shiitianiyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jiiitanu paniya na muerasuni. Na doce saquiriojosano pueyari na cojiriquiaajaacuhuj.

² Noojiaqueya maajipohuari na tarajariquiaajuhuaj. Cuno maajipohuari tamaatia

cusonujiniji Jesu naatanijosano quiquiaari.

Tii quiriquiaajaariuhua noo maajipohua, Jesu nojorijiniji tohuatanijoquiaari samaruhatej.

Nojorijinijinoori quiquiaari María Magdalena. Jesuuri cuno Maríajiniji tohuatanijoquiaari

siete samaruhua. ³ Quiriquiaajaariuhua Juana, Cuza niquiocvani. Cuzaari jiyaniijia Herodes

jiiitasano casami cojuana quiquiaari. Susaanaari nojorijinijinio quiquiaarijuhuaj. Socua

queraatia maajipohuari quiriquiaa. Puetunu cuno maajipohuajanaari Jesu naacutaquiaari

tama nojori jiiitasano casaatajaaja. Nojoriiri nera

pueraquenuunaa quiquiaarijiuhuaaj, tiquiyocua nojori rucuanijosacari Jesuta.

Jesu pohuatasano natoojona pueyanojiniji
(Mt 13.1-9; Mr 4.1-9)

⁴ Queraatia cuno jiya tiacajinijinio pueyari nijioquiaari nojori niquniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasanta. Nojori sequereeri:

⁵ –Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaquiaariiri. Shuhuari na miojoquiaari.

⁶ Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷ Tajaacaari toteree riyocuaca tajinia. Riyocuacaari socua ritia maashiquiaari. Na natanoori tarinitiucuaa quirii. ⁸ Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pohuatasano!

Casaarate miriqui pohuatasaroni
(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitijonu paniani. ¹⁰ Jesuuri nojori riucuaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niquiara pohuataquiaa miriqui cutarani. Naacuajitij, nojoriiri cua pohuatasano niishiyaquiquiaa na tojitasacari. Naajuhuj, cua cumaacata cua miishano cariyoshitiuquiaari, nojori niquiara cua miishacari.

Jesu niishitiojosacari na pueya, miriqui na pohuatasano natoojonajiniji
(Mt 13.18-23; Mr 4.13-20)

¹¹ 'Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. ¹³ Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasocua tiuquiaa shuquiriaatiaari. Naa miijiacaaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasocujia rupatequiaa. ¹⁴ Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuqiritiniuriajuhuaj. Naaratej, nojoriiri juhua

muetuhuo natau quiya, tarinitiucua riyocuaca tariyoshitishano. ¹⁵ Maninia jiyajinia toteno jajauri saniniuujia juhua noo pueya, canapueete maninia tojitiareecuaja Pueyaso rupaani. Na racataa maninia noojiajiniaari. Pueyaracaanu na tojtiaquiaari. Majaari na pishiniu Pueyasooquaji. Naacuajitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja

(Mr 4.21-25)

¹⁶ 'Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitiasacari tiajiniaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pohuatasaaaria puetunu pueya niquiarajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia miijiosanojuanaari niishishaanutaniyajuhuj. Cuhuatasaanutaniyari maninia niquishocoriquiano. ¹⁸ Cunora, cua sequesano tojtiajaca nia quiri maninia. Cante maninia jiiitaa cua rupaani, nojuajaari socua na niishijjara jiyatesaanutaniya. Saniniuujia, cante cua rupaa tojijashijiani, secaja najuhuana na niishishanoori jaariutiasaanutaniya, puetunu shaaquiriajanaa.

Jesu tapueyocuaca tiuquiiijosacari Jesuucua nojori nucuata

(Mt 12.46-50; Mr 3.31-35)

¹⁹ Jiyacaritij, Jesu nucua Jesu tapueyocuacata tiuquiiioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritiariquiaa saaja tia tohuateyaji. ²⁰ Tamonuuri Jesu numooteree:

—Quia nucua quia tarajanuhuata jati carijini-acuma quiya. Quia niqutiuniu paniyaquinia.

²¹ Jesuuri tii quiniaa niquiara sequeree saaja:

—Canapueete seetanujuanaa Pueyaso Rupaa tojitiajacani, nojoriiri cua nucua cutara, cua tarajanuhanio.

Jesu pueyajetesacari paratu, mohuacanio

(Mt 8.23-27; Mr 4.35-41)

²² Tamonu juuca, Jesuuri botejinia tacataquiaari na saquirojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyanohua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. ²⁴ Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucuaja! ¡Nia suraajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacuaja juucua Pueyasooocua tiuujiaa. ¿Casaa nia tojetareerini?

Nojoriiri Jesuucuaaji jiuujiatecoree. Shiriiqui-tiuriquiaari Jesu miishano nojori niquishacari. Tama nojorijiaaritia nequesoreetooriquiaa:

—¿Cantucuaanojoni? ¡Paratu, mohuacaari na to-jirii na sequesacari!

Gerasa jiyajinijinio samaruhuaraca pueyano-jiniji pohuatasano

(Mt 8.28-34; Mr 5.1-20)

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqui. ²⁸ Na niquishacari Jesu, na cariquimiaji mojuquetaseeri. Jesuucua nacareeri:

—¿Casaara quia niyaree miji canaa quia cushi-tionurani Jesunaa? ¡Quia niishiyanijia! ¡Quiaacuajaari Jiyaniijiajanaa Pueyaso Niyanu! ¡Cua tarini-tiare quenaaja! ¡Maja naquiya cua miiniu!

²⁹ Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji.

Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiqiyocua, pueya quiyaquishaqui na quiniuria. ³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucuaaree:

—Cua sesa “Queraatia”.

Naa Jesu sequequiaariiri jiyanohua queraatia samaruhua na jiiτίαςacari. ³¹ Samaruhuari jiyanohua secojoree Jesu, maja nojori na jiyaronura puequeetuaju raama saniitiosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohareetaquee. Cushiyajinia tiuquitiaseri. Puetunu cushiyajanaari cocuateree. Tacobiniji totesee caminiajiniaari. Tii shushiniuuriiri.

³⁴ Cushiya cojuanaa jaara niquiquiaari na miishanotej, nojoriiri netecuatiquiaari na shiriiquiniutia, Jesu miishano nojori pohu-atanura tiacajinia, cuhuariquiacajiniajuhuaj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pohuatanuusanojiniji nojori niquiniuria. Nojori tiuquiiijosacari Jesuucua,

nojoriiri cuno pueyano niqushii, canajiniji samaruhua tohareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niqushacari nojuajatej, pueretuquiaariiri. ³⁶ Jiyacaritij, Jesu miishano niqutiuniaari shusha nijiono pueya pohuataree taa samaruhuaraca pueyano naatanishaarohuani. ³⁷ Cunora, puetunu Gerasa jiyajininio pueyajanaari jiyanhua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejina tacataquiaariuhua na pueyata na quianuhua. ³⁸ Cuno pueyano, canajiniji samaruhua tohareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tiajinia quia quiaarohua. Quia pueya niqiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinijanaa pohuatasuhuari taa Jesu miiriucuaa maninia nojuajani.

Jesu naatanishacari Jairo niyatu, Jesu toque quiana maajinio

(Mt 9.18-26; Mr 5.21-43)

⁴⁰ Jesu jaara niutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji

mojoquetaseeri na secojonura na tiajinia Jesu quianura. ⁴² Neyatuniyojuaari quera cusoriquiaa jiyacari. Majaari socua niquiohwaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanohua queraatia pueyari nata quiojoriquiaajuhuj. Pueyari jiyanohua na tanuujoriquiaa, nata nojori quiojosacari nucuaco.

⁴³ Tamonu maaji cusosuuri cuno pueya tajinia quiriquiaajuhuj. Doce marijiaari tari na shocojoquiaari pueyaracaanu na naatesacari. Cuno maa-jiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari.

⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquiniucua? Queraatia pueyacuaajaari quia tanuujia.

⁴⁶ Jesuuri saaja sequeree:

—Maja. Cusosu cua quiareeni. Niishiyanjia cua cumaacaari tari na naatanirii.

⁴⁷ Maaji niishishacari na miishano jiyasohujaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiarajanaa

pohuatareeri casaara Jesu na quiareeni. Pohuatareejaariuhuj taa na naataquee ritiani, Jesu na quiasacari. ⁴⁸ Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhua-janiya quia quiaarohua.

⁴⁹ Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajinia.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucujaja naatanutaniuhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriuucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhuana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricujajaari niishiriquiaa maaji samiriuri seetanujuanaa macu quiriquiaa. ⁵⁴ Jiyacaritij, Jesuuri macuucua tiuquiquii. Na juaashiquiajiniji na quiaseeri. Jiyanohua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶ Na queyari jiyanoehua jiuujiateree. Jesuuri nojori sequeree, maja nojori pohuatanura tamasa niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumaacaari, puetunu tamaatia sesa samaruhanana nojori tohatejonura, cusosuhua nojori naatanijionurajuhua.

² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanajotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Niaa jaara tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. ⁵ Niaa jaara tamonu tiacajinia tojiniu paniaquishaare, cuno tiacajiniji nia quiaare. Nia nuhanajiria, cuno pueya niquiara niocua nia niuhanajiniji

cuno tiaca jaaquia nuutare. Naacuaajitij, cuno pueyari niishiniutianiya, Pueyasoori nojori jiyanoyaquiniutianiya, nojori tojtianu paniyaquiniuucua Pueyaso rupaa pohuatanaa.

⁶ Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniiija Herodes niishiniu panishacari cante Jesuni

(Mt 14.1-12; Mr 6.14-29)

⁷ Jiyaniiija Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuajaari jiyaniiija Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuj: “Supuetana Elíascaja tari tiuquiriohua”. Nojuacuajaari tariucuacaanu Pueyaso sequenu panishano caminiujiunia quijia. Saniniuujia, tamasca pueyari sequeriquiaajuhuj: “Jesucuajaari tamonu tariucuacaanu Pueyaso sequenu panishano caminiujiunia samiitianohua”.

⁹ Herodesri saniniuujia sequeree:

—Janiyacuajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niquniu paniriquiaa juucua.

*Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)*

¹⁰ Jesu jiyaramiquishano pueya tacatesacari-uhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

¹² Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuaara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiitiaani, caapiquiriyatu sapitiaajanio. ¿Canaateeri secaja pa cumanecata masenutaniya queraatia miaquesano puetunu nio pueyarajanaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqui, socua cincuenta

tamaqui. Mianuutesocoriquiano puetunu pueyajanaa, cuaara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niquitioreeri puetunu pueyajanaa nojori serotasocoriquiano. ¹⁷ Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio.

*Pedro sequesacari Jesuuri seetanujuanaa Cristo
(Mt 16.13-19; Mr 8.27-29)*

¹⁸ Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhuj, quiaana Elías, tariucuacaanu Pueyaso sequenu panishano caminiujiunia. Tamasacaari saniniuujia quia sequequiaa, quiaa naasucwana tamonu tariucuacaanu Pueyaso sequenu panishano caminiujiunia samiitianohua.

²⁰ Jesuuri saniniuujia nojori nequesotaree:

—¿Niajanियariuhuaj? ¿Taa nia sequeyani, cante janiyani?

Pedroori na sequeree:

—Quiajanियacuajaari Cristo, Pueyaso Jiyarosano.

²¹ Jesuuri jiyano-hua nojori rootaree maja nojori pohanatnura tamasa niquiara cante nojuajani.

Jesu numootesacari na pueya, nojuaja mosaanutaniya

(Mt 16.20-28; Mr 8.30-9.1)

²² Jesuuri naa nojori sequerohuacuhuaj:

—Janiyari jiyano-hua naquiya miishaanutaniani. Pa Judiocuaca camarucuaari cua niquiniu paniyaquiniutianiya, na tojitianu paniyaquishacari janiya. Naajuhuaj, pa pueyacuara secojona jiyaniijianucuaari cua niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuan.

²³ Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuara niyajetaara tama na miiniu panishanojuaaja. Cuara panitiaara tama na cuaqueyajaaja puetunu juucajanaa, cua tojijia na quiniuria seetanujuanaa.

²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyano-hua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani,

nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijanaa jiiitiana quiri, cuno maara najuhuana quiri, nojuaja jaara na shaajesacari jataasaare mani quiquiojinia Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuj. Naajuhuj, cante cua rupaa pohuatanu caririquiya sesa miijica pueya niquiarani, janiyari nojori seera caririquiniutianiyajuhuj. ²⁷ Seetanujuanaa nia sequeyanijia, noojiaqueya niajaniyajinijinioori maja nia cusonuunu quiniutianiya juhuanujuaja, niaa cuara niquirijiaatijia Pueyaso cumaaca tiuquiyoano cucua, na muerasu jiiitariquianoni.

Jesu jatasacari shacantuucara
(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. ²⁹ Jesu secojosacari Pueyaso, na jiquiocoori tamaatiara jataquiaari. Na toqueeri jiyanohua cohujara jataquiaarijuhuj, shacantuquera. ³⁰ Jiyacaritij, caapiqui pueyari nocua muetaquiaari. Jesuta pocoojoriquiaari. Nojoriiri quiriquiaa

supuetana Moisés, supuetana Elíasnio. ³¹ Nojori nujuatusaquiiri shacantuuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanohua maquenuujoriquiaa, nata quiniaajuhuj. Naajaa, majaari nojori maquenu quiriquiaa. Naacujitij, nojoriiri Jesu shacantuuca niqiquiaari. Cuno caapiqui supuetanaa niqitiuriijaariuhuj, Jesuta pocoojiyano. ³³ Cuno caapiqui pueya quiojonu panishacariuhua Jesu shuriucuj, Pedroori Jesu sequeree najuhuanaj:

—¡Niishitiojonanaa, canaa namitia niya quiyani!
¡Canaa suhuororeera jiuujianaraca suhuorotucua;
quiara, Moisésra, Elíasranio!

Pedroori naa najuhua pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojinu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niqitiariquiaa. Na nuhuaji, majaari quenaaja tamonu nojori pohuatana quiquiaari nojori niquishano, Jesu jaara samiitiaquiaariuhujaatijaj.

*Caya samijajiniji Jesu tohuatesacari samaru
(Mt 17.14-21; Mr 9.14-29)*

³⁷ Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere que-naaja! ¡Cua niyanuniyojua quia niquiri! ¡Jiyaniojuanaari quiyanuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocuatequiaajaariuhua! ¡Na rupaamajiiri cushaaquiaa! ¡Na cuaqueya miiquiaa moquitiuriuriaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojitiaashijiacanaa, niaaqui Pueyasooqua tiuyashijiacajuhuanajaj. ¿Janiyateeri pueyaracaanu rejeretanutaniya niajaninyani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocuatereeri. Jesuuri samaru sequeree na tohuatanura. Caya samijia naataniriiri. Na niquitiorohua na queeri.

⁴³ Puetunu pueyajanaari jiyanohua jiuujiateree nojori niquishacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya

(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya niajaninyani. Majaari na niyajetanu. Janiyari

niquitiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhuj, casaa nojori na pohuatasano sequenu paniriquiaani.

Cante jiyaniijiajanaa cutarani

(Mt 18.1-5; Mr 9.33-37)

⁴⁶ Jesu pueyari juhuacatecara juayonuu-tariquiaa teyano nojorijinijiniote jiyaniijiajanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuaani, nojuajaari cua rupueyajuhuj. Cante cua rupueyani, cua Jiyarona rupueyajaariuhuj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijiajanaa quiniutianiya puetunu narta Pueyaso muerasujinijiniojuanaa.

Cante maja pa paracani, nojuajaari pa jiyano

(Mr 9.38-40)

⁴⁹ Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniuucua pajaniyajinijinio.

⁵⁰ Jesuuri na riucuaaree:

—¿Casaara nia tenujurucuaarinioj? ¿Niaateeri ni-
ishiyaquiya, cante pa paraca quiyaquiyani, nojua-
jaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu,
nojuajaari juhuacatecara Jerusalén tiacajiniara
quiaaree, juhua jiuujiaaju na puereyaquiniutia.

⁵² Jerusalén tiacaacuara nuu cajiniocua Samaria
jiyajinia Jesu quishacari na pueyata, noojiaqueya
na pueyajinijinio puerateree tamonu tiacajinia
nojori masenura tia nojoriicuaajiiri. Naacujitij,
na pueyari Samaria jiyajinia quijia shiitianiyojua
tiacajinia quiojoquiaari tii Jesu maquejara
nojori pajenura. ⁵³ Cuno Samaria pueya jaara
niishiquiaari Jesuuri Jerusalén tiacajiniara
quiariquiaa, majaari nojori paniniu quirii
Jesu maquenura nojori tiacajinia. ⁵⁴ Santiago,
Juan niishishacari cuno Samaria pueyari nojori
sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria
mani jiyocuacaanuji, cuno pojori na catijianura,
taa tariucuacaanu Pueyaso sequenu panishano
caminiujiunia Elías miiquiaaricuaani?

⁵⁵ Jesuuri nojoriicua tacateree. Nojori naca-
sureeri naa nojori saniitionu panishacari cuno
Samaria pueya. Naa nojori sequereeri:

—Majaari nia niishiniu cana sohuanute naa nia
niishiriojoteyani. Nia niishiri, majaari cua ninu
quiquiaari mijiria cua puecoonura pueya. Saaja
niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua
tiacajinia quiojiyaree tii maquenura.

Tamasaca pueya quiniu panishacari Jesu pueyara juucua

(Mt 8.19-22)

⁵⁷ Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiquiyocua quia rucuanijosacarijianaa.

⁵⁸ Jesuuri na riucuaaree:

—Quiojuapueeri na raaca jiitiaa cutara. Shuhuari na jesuhua jiitiaajuhua. ¿Saniniuujia Pueyaso Niyanuurijataj? Majaari cua jiitianu tama cua maquejarajaaja.

⁵⁹ Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereeja:

—Cuaara Jiyaniijianaa. Cua que cuara cua niquiara shaajeerajaara. Janiya jaara na jamoreni, janiyacua na nuhuaji quiata rucuanejore cutarani.

⁶⁰ Jesuuri na riucuaaree:

—Naajaa, quia tarinitiare. Cua tojitiaashijia-caari juhua macunucua. Naaratej, cuno macunucua cuara jamoora tama narta macujuaaja. Quia rucuanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequeree:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niquiniuria cua nuhuajiria.

⁶² Jesuuri miriqui na riucuaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niquiniu. Na camaru jaara na nijiniara niquiri, sesa naaniu-tianiyari shuyorocotiuyocuara. Naajuhuj, cua pueyano jaara na quiquiojinia tacatenu panijiohua quiri, nojuajaari maja maninia Pueyasora poonijiona.

10

Jesu jiyaramiquishacari setenta y dos na pueyajinijinio, Pueyaso rupaa nojori pohuatanura

¹ Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuj. Puetunu nojorijianaa jiyaramiquiriiri caapiqui, caapiqui. ² Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoonaari quiya. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. ³ Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. ⁴ Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu

pueya nia saruhuatasacari. ⁵ Tamonu tiajinia nia tiuquishacari, coteenu nia saruhuatare na camaru nio sequesanta: “Juhuajaniya nia quiri, nio tiajinia quiniaanaa”. ⁶ Cuno tiajinia quiniaa pueya jaara jiyanoojiaca quiri, naa nia sequesacari, Pueyasoori nojori miiniutianiya maninia. Nojori jaara juaajiaca quiri saniniuuja, Pueyasoori nojori shuquiritiyaquiniutianiya. ⁷ Tee nia masesaareni, cuno tiajinia nia jiyojere. Nia miaquere, nia rature nojori niqutiosano niajaniya. Nia pohuatanuucua Pueyaso rupaa nojori niquiara, niajaniya cuaara niqutiosaaria nia panishano. Majaari tamasaca tiajinia nia pacunujunu tii nia miaquenura. ⁸ Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹ Cusosuhua nia naatanijiore cuno tiacajinia. Pueya niquiara nia sequere: “Pueyasoori quiaritia nia jiyatenu paniya na muerasu nia quiniuria”. ¹⁰ Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: ¹¹ “Nia tiacajinijinio jaquiani, canaari canaa nioluacaacua nia majiriutiaani. Cunoora nia niishiniuria, Pueyaso jaara nia saniitiore, majaari canaacia na tiutiasaanu quiniutianiya. Pueyasocuaajaari nia jiyanooni paniriqiaa juucua, na muerasu nia quiniuria”. ¹² Seetanujuanaa nia sequenijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanoohua saniitiosaanutianiya Sodoma tiacajinia quiniaa

pueyajiniji.

Jesu piriyojosacari Pueyaso tojitiaashijiaca pueya

(Mt 11.20-24)

¹³ '¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanoehua saniitiosaanutaniya! ¡Niaari socua Pueyaso tojijashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niqiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijiaca nojori quiniucua.

¹⁴ Naa cutaraari cua cumaacata cua miijiosano niqijia. Naajaa, majaari nioojia nia tacatonu quiqianu Pueyasocua. Naaratej, Pueyaso saniitionu juucajinia, ¡niaari socua jiyanoehua saniitiosaanutaniya Tiro tiaca pueyajiniji, Sidón tiaca pueyajinijinio! ¹⁵ Niajanijarijataj, Capernaum tiacajinia quiniaa pueyanaa, ¿niaateeri jiyaniya niaari jiyocuaaanu quiniaara jiyatesaanutaniya? ¡Maja! ¡Niaari puequeetuuj raama quejoosaanutaniya saniya!

¹⁶ 'Cua pueyanaa, cante nia tojitiajacani, nojoriiri cua tojitiajacajuhuj. Naajuhuj, cante nia ruuretaa cua rupaa nia pohuatasacarini, nojoriiri

cua ruuretaajuhuaaj. Cante cua ruuretaani, nojori-iri cua Jiyarona ruuretaajuhuaaj.

Jesu jiyaramiquishano setenta y dos pueya tiuquiiijosacariuhua nocua

¹⁷ Jesu jiyaramiquishano setenta y dos pueyari Jesuucua tiuquiiioquiaariuhua. Nojoriiri jiyanoehua shuquiriaatia quiriquiaa. Jesu sequetureeri:

—Jiyaniijianaa, samaruhuari canaa tojitiacanuni canaa tohuatanijosacari nojori, canaa jiyaniquishacari quia sesa!

¹⁸ Jesuuri nojori sequeree:

—Taaquiriirinij. Janiyari Sesaaca niquiquianuni juhua niaco tiyano jiyocua-caanuji. ¹⁹ Janiyacuajaari cua cumaaca nia niqutiocanuni, juhujaniya nia rucuanenura sacocua caco, turucuaniiiniu caconio. Cua cumaacata, niaari puetunu Sesaaca cumaacajanaa shocotanutaniya, juhujaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya niajaniya.

²⁰ Naajaa, majaari saaja shuquiriaatia nia quiniu samaruhua tojitianuucua niajaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari
(Mt 11.25-27; 13.16-17)

²¹ Jiyacaritij, Pueyaso Sohuanuuri Jesu shuquiritirii jiyanoehua. Cunora, Jesuuri na Que Pueyaso sequeree:

—¡Quia shuquiritiaanijia cua Quenaa! ¡Quiaacua-
jaari Jiyaniijiajanaa quiya jiyocuacaanu, mijiri-
anio! ¡Quiaari maninia miirii! Cua pueyari
juhua naatujoori, maja puera niishijaca. Naa-
jaa, quiaari quiarijia nojori niishitirii quia niishis-
hano, quia jamosano mijiria niishijacaacuaji.
Jaa, cua Quenaa, quiaacuaajaari naa nojori paniti-
aja.

²² 'Cua Queeri tari cua niquitioquiaari
puetunu na jiiiasanojuanaa, Jiyaniijiarano
cua quishacari. Majaari tamonu niishiniu
quenaaja cante Pueyaso Niyanuni, saaja cua
Que cutaraari cua niishiya. Naajuhuj, majaari
tamonu niishiniu cutara cante cua Queni. Saaja
janiya cutaraari na niishiyani. Naajuhuj, noo
pueyari na niishiya, canapue cua niishitiniu
paniya cua Quecuajani.

²³ Na nuhuaji, Jesuuri na pueyacia tacateree.
Saaja nojori sequereeri:

—Shuquiriaatia quijiaca cutaraari niajaniya,
nia niquiniuucua puetunu nia niquishanojuanaa
nia rupuenuucua janiya. ²⁴ Seetanujuanaa nia
sequeyanijia, queraatia tariucuacaanu Pueyaso
sesquesano caminiujiuniaa pueya, mariyata jiyaca
jiyaniijianucuanio, nojoriiri nia niquishano
niquiniuucua jiaatiaquiaari juucua. Majaari
na niquitiuniu quiquiaari. Nojoriiri cuata
nia quishacari nia tojishano tojitianuucua
jiaatiaquiaari juucuaajuhuj. Majaari na tojitiuniu
quiquiaari.

*Samaria jiyajininio maninia miijajiniji pohu-
atasano*

²⁵ Na nuhuaji, Moisés Rootasanojiniji niishitiojona pueyanoori Jesuucua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucuaaree:

—¿Taate Moisés Rootasanojinia naajiotasanoni? ¿Taa quia niishiriojoquiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riucuaaree:

—Naa sequeyano:

“Quia Jiyaniijia Pueyaso quia paniri puetunu quiiojiatajanaa, puetunu quia sohuanutajanaa, puetunu quia cumaacatajanaa, puetunu quia niishitiajatajanaanio. Naajuhuj, quiarta pueyano quia paniri taa quia paniyacuaa tama quia cuaqueyajajani”.

²⁸ Jesuuri na sequeree:

—Quiaacuajaari maninia riucuaaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén

tiacajiniji. Nohuasenuujuaca pueyari na quiaree. Puetunu na jiiitasanojuanaa na jaariuutiatureeri, na cushishano toquenio. Na piquitiuriiri. Quera macu na tiujiatuqueeri.

³¹ Na nuhuaji, pueyacuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquiocora, na shocortamaa saajaari.

³² Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj.

³³ Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree.

³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia.

Ritia na jiyataaree rucoojojuaca tiuquiiijiojua tiajiniaaraari. Cuniqum na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camarum na niqutioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niquitiorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijinioni, ¿teyano cuno

pojorijiniiniote narta pueyanoocua taraajeja cutarani?

³⁷ Moisés Rootasanojiniji niishitiojona pueyanoori Jesu riucuaaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequereee:

—Taaquiriririnj. Quia quiaarohua. Naa puey-
acua taraajeja quia quirijiuhuaj, taa cuno tahue
taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiiitaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojini-
uria Jesu pohuatasano. ⁴⁰ Marta cutaraari poonijioriquiaa queraatia na miishocoriquiano na jiiit-
asacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¡Quia sequere na naacutanura janiya!

⁴¹ Jesuuri saaja na sequereee:

—Martanaa, quioojia quia cajitiri sanaunaa. Quiaari puera quia miishano tacaatiaa. ⁴² Saaja niquiriyatu casaa cutaraari jiyanoehua panishano. María cutaraari cuno socua panishano casaa

saquiriojoree. Tamonuuri maja na naata na tojishano jaariutianu noojiajiniji.

11

Jesu niishitiojosacari na pueya nojori secojonura Pueyaso

(Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinioori na sequere:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacuaani.

² Jesuuri nojori sequere:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuaani. ³ Canaa quia niquitioriquia canaa miaquesocoriquiano canaa panishano puetunu juucajanaa. ⁴ Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miniaani. Naajuhuj, canaa quia cojuare, maja sesa canaa miitishaanura”.

⁵ Jesuuri naa sequereejuhuj, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa

jaara na sequere: “Cua rupuenanaa, cua niqutiore jiuujanaraca pan. ⁶ Tamonu cua cojiniari shusha tiuquiriohua tucuacaanuji, miaajeyari. Shaaquiiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupuenta jaara na tiajiniacumaji quia riucua?: “Maja cua taajetenu. Cua tia tiootiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequeretej, niaa jaara na tia tiootiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura niajaniya puetunu nia panishanojuanaa. Majaari na sanenu quiniutianiya saaja nia rupuenta na quiniucua. Sanenutaniyari pueyaracaanu taajeta nia piquishacari na tia tiootiu. ⁹ Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiootiu nia piquiriagua. Niaara riataasaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiootiu piquiquiaani, nera riataasaanutaniyari.

¹¹ ¿Niaatucua nia niyanu niqutiore saajia, neecaruu na masesacari niajaniya? Maja. ¿Niaatucua soconu niqutiore nia niyanu, sapitiaaja na masesacari niajaniya? Maja.

¹² ¿Niaatucua turucuaniiinu niqutiore nia niyanu, caacaraja riuriuquiu na masesacari

niajaniya? Maja. ¹³ Puetunu niajanijajanaari sesa miiniu niishijiaca. Naajaa, niaari maninia casaa niqutionu niishiya nia niquiouhua. ¿Taatucuaa socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuete na masequiaacuajani.

Pueya sequesacari Jesu, samaru cumaacarcana

(Mt 12.22-30; Mr 3.20-27)

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. ¹⁵ Tamasaca pueyari saa sequequiaarjia:

—Cuno pueyanoori samaruhua tohuatanijiya samaruhua jiyaniijia Satanás cumaacata.

¹⁶ Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio.

¹⁷ Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritiano nojori quishacari. Naajuhuj, niquiriyatu tiajinia quiniaa jaara

tama nojorijiaaja juayonuujutaquiaa, nojoriiri maja na naata jatiqui quiniu. ¹⁸ Naajuhuj, niaari cua sequeriquiaa, janiyana samaruhua tohuatanijiya Satanás cumaacatani. Jaara naa quiriritij, ¿Satanástucua taa pueyaracaanu quiri jiyaniijiani, nojuaja jaara tama na samaruhajaaja tohuatanijiya tama na cumaacatajaaja? ¹⁹ Naajuhuj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuj, cana cumaacata nojori tohuatanijioquiaa samaruhuani? ¿Taa nia sequeyani? ¿Satanás cumaacatatee? Majaruhua. Naacuajitij, tama nijaniyajaaja nia niishiri, niaari jiyajeneya. ²⁰ Naa Pueyaso cumaacata cua tohuatanijosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

²¹ 'Niojinia nia niishiriojorejuhuaj: cumueeca pueyano jaara na tia cojuaa queraatia na mi-aquejotaja casaata, majaari tamonu naata na jiiti-asano casami jaariuutianu. ²² Saniniuujia, socua cumueeca pueyano jaara nocua tiuquiri, na mi-aquejotaja casaa jaariuutiaari, cuno, nocua na tiushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuj, janiyari Satanás jiitiasano jaariuutiajani.

²³ 'Cante cua jiyano quiyaquiyani, nojuajaari cua paraca. Cante cua naacutaaquiya pueya rereconura Pueyasorani, nojoriiri saaja pueya cocuataa Pueyasocuai. Naaratej, jacaria nia niishiriojore casaa nia niishiriojiya janiyajinijini.

*Samaruhuari riujiuujia na quiquiojiniohua
(Mt 12.43-45)*

²⁴ 'Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: "Cua quiquiojinia riujiuyarohuaraqui teje cua tohuatacanucujani". ²⁵ Samaru tiuquishacariuhua cuno pueyanoocua, na riuriatasuhuari shaaco, juhua maninia netoonujusano tia, maninia jeenucuasanojuhuaj. ²⁶ Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitiasuhua. Naacujitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—¡Shuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riuquaree:

—Socua shuquiriaatia quijia saniya sajara cante Pueyaso rupaa tojijiani, cante Pueyaso panishano miiquiaajaaniuhuj.

Sesa pueyari saaja Pueyaso cumaacata miishano niquiniu panijiaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niquiara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujuanaa majaari socua cua niquitiniu quiniutianiya nojori, cua cumaacata cua miishano. Nojoriiri saaja niquiniutianiya cutara taa cua miishaanutaniyani, naatej taa supuetana Jonás miishaaquiaaricuaani. ³⁰ Jonás miishaanuuri nocuaji jiuujiatesano quiquiaari cutara. Naacuajitij, Nínive tiacajinia quiniaa pueyari niishi quiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosanoni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanohua tucuacaanuji niquiaari narta jiyaniijia Salomón tojiniuucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori tacatoyaquiniuucua nojori jiuujia sesa

nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pahuataquiaari nojori niquiara. Pueyaso sequenu panishano caminiujiunia quiarjia nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pahuatasano
(Mt 5.15; 6.22-23)*

³³ Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitiana cuhuatariquiano. ³⁴ Pa namijaari juhua pa cuaqueya cuhuatanajuhuj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casaa niquiniuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijara quiri puetunujuanaa, juhua samaritiu cuhuatasacari nijaniya. Naacuajitij, niocua niishijia quiri, maninia miijia nia quiniuria.

*Jesu nacasusacari Fariseocuaca, Moisés
Rootasanojiniji niishitiojonaanio
(Mt 23.1-36; Mr 12.38-40; Lc 20.45-47)*

³⁷ Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishiiianaari.

³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niaari juhua noo pueya, canapute saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhuj. Niaari sapuenu maninia pueya niqishano. Saniniuujia nioojiacaari jiyanoehua sesa quiya, casami nia masejonuucua nia nohuasejonuta, puetunu sesa nia miiniutiajanaajuhuj.

⁴⁰ Mosanucuaanaa, ¿niaateeri niishiyaquiya, pa cuaqueya Shipininiaari poojia shipiniquiaarjiiuhuj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴² ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiniojuanaa, Pueyasora nia niqitiosocoriquiano. Cuno jaamasucuaari culantro,

menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricujani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniurajuhua. Majaari cuno na sequesano nia miiniu quiquiaa. Puetunu na sequesanojuanaa tojjiaca nia quiri. Majaari saaja jaamasucua niqutiojuaca nia quiniu.

⁴³ ¡Niaari taraatia miishaariquiano, Fariseocua-canaa! Niaari jiyaniijianucua shuriucua cajini-uucua jiaatiaquiaa, Pueyaso secojojua tiajinia nia quishacari, juhua cutara pueya nia quini-uria pueya niqiara. Naajuhua, niaari pueya paniquiaa nojori saruhuatanura nijaniya juhua jiyaniijianucua, nia rucuanijosacari tiacajinia.

⁴⁴ ¡Niaari taraatia miishaariquiano! Niaacua-jaari juhua niqishoo jamaca. Pueyari juhua-janiya na caco rucoquiaa na niishiyaquishacari. Naajuhua, pueyari juhuajaniya nia rupuequiaa, nojori niishiyaquishacari nioojaari jiyano-hua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji ni-ishitiojonaari Jesu sequeree:

—¡Niishitiojonanaa, naa quia sequesacari Fariseocuatej, quiaari canaa sequeyajuhua!

⁴⁶ Jesuuri na riuquaree:

—Taaquiririnij. ¡Niaari taraatia mi-ishaariquianojuhua, Moisés Rootasanojiniji niishitiojanaanaa! Puetunu nia rootasano-juanaari juhua jiyano-hua niiquia casaa nitiasocoriquiano. Majaari nia tojitajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura.

Naacuajitij, pueyari maja na naata rejeretanu nia niishitiojosano.

⁴⁷ 'iNiaari taraatia miishaariquiano! Niaari macunucua niojotajara shipinijioquiaa shanohuara, tariucuacaanu pueyara Pueyaso sequesano caminiujiuniaa nucuahuacuaji, teyano nia supuetanaa puecooquiaaricuajani.

⁴⁸ Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhoa.

⁴⁹ 'Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniya-juhuj”.

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapuate nio jiya coteejajiniji puecoosaaquiaaricuajani.

⁵¹ Coteenujuanaa mosaaquiaariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasoocudara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² 'iNiaari tارااتيا miishaariquiano, Moisés Rootasanojiniji niishitiojonaanaa! Niaari najuhuana Pueyaso Rupaa jiiťiaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasaca jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaana, mariyata Fariseocuacaari jiyanoohua juaaquioree. Jiyanoohua nojori juaaquiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. ⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanoohua jiyanoohua queraatia pueyari Jesuucua rerejoree. Tama nojorijaarijia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniuujiniji. Nojoriiri sapuenu maninia miijiaca pueya niquishano tamasaca niquiara. Saniniuujia, nojori jiuujiaari saa sesaja pueyaracaanu. ² Nia

niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuj. ³ Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamaraajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

Cante puereshiya cutarani
(Mt 10.26-31)

⁴ Cua rupuenanaa, majaari nia puerenu canapueete nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. ⁵ Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajaniya mani quiquiojiniani, na cusojuanu nuhuaji niajaniya. Saaja nojuaja nia puerere cutara.

⁶ Cinco shuhuari saaja caapiqui cumaneecaniy-
ojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷ Naajuhuj, nia miesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

Tamasaca niquiara pa sequere paari Jesucristo pueyani
(Mt 10.32-33; 12.32; 10.19-20)

⁸ Cua tojitiare. Cante tamasaca niquiara sequejani: “Janiya Jesucristo pueyanoni”, naajuhuaaj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹ Cante saniniuujia tamasaca pueya niquiara seetaa janiyajini, cua pueyano na quishacarini, janiyari cua Que Pueyaso seya niquiara na tamacanutaniyajuhuaaj.

¹⁰ Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

¹¹ Cua muerasu nia quiniuucua, niaari Pueyaso secojojua tiajinaqueya jiyatasaanutaniya, nequesoreenaa niquiara, mijiria jiyaniijianucua niquiarano. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia sequenutaniyajaaniuhuaaj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niqutionura janiya canaa shipininio jiiti-asanojiniji, taa canaa shipininio sequequiaari canaacuajani, samini na quishacarijia.

¹⁴ Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura niajaniya nia shipininio casamini?

¹⁵ Jesuuri naa nojori sequequiaarijiuhuj:

—Jiyanohua nia cojure tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

¹⁶ Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanohua casamiriaca. Na cuhuariquijania na natoosanoori jiyanohua muetuquiaari. Naacuajitij, queraatia miaquesocoriquiano jiiitiaquiaariiri na cuhuariquijiniiji na carojotasano. ¹⁷ Tama sequereejariija: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸ ¡Jaj, niishiQuiinijia! Coteenu cua tiajosano cua casamiicuaaji niyaroorohuaraqij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquijiniijiniojuanaani, puetunu cua jiiitiasano casamijianaanio. ¹⁹ Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiariija cutara juhuajaniya quia quiri. Quiaari queraatia casamiriacacuaja, queraatia marijara. Quiaari queraatia quia miaquesocoriquiano jiiitiaacuaja. Quiariija cutara quia samaatere. Quia miaquere. Quia rature. Tama quia cuaqueyajaaja quia shuquiritiri’ ”. ²⁰ Cuno niucuaja, Pueyasoori na sequequiaari: “Moseecanaa, quiaari quiariija

macu juhuaquenutaniya. ¿Canteeri puetunu quia jamuesano casamijanaa jiiitianutaniya quia nuhuajini? ¿Canra na quiniutianiyarini?”

²¹ Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanjuanaa casamijiuniucua Pueyasora.

Pueyasoori na muerasu cojuaja maninia

(Mt 6.25-34)

²² Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutianiyani. ²³ Pueyaso jaara pa shipiniquiaari saminiio pa quiniuria, majaari jiyajeneta nera na rishitiniuria pajaniyajuhuaaj. Naajaariuhuaaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuaaj. ²⁴ Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuaaj, majaari nojori jiiitianu na miojosano na racataja. Majaari tiaca nojori jiiitianu na carojotasano nojori racatajarajuhuaaj. Naajaa, Pueyasoori nojori miojotequiaa. Niaa cutaraari socua jiyanoehua Pueyaso panishano cuno riquiacuhuaajiniji. ²⁵ Naajuhuaaj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanoehua nia tacaaniutia? Maja nia naata.

²⁶ Naaratej, nia tacaaniu jaara najuhuana quiya socua shiitaniyojua nia rishiniuria, ¿niaatucua casaara tacaari tamonu casaacuani?

²⁷ 'Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenuunujuhuaaj. Supuetana jiyani-ijia Salomónri jiyano-hua shanohua toqueyaraca quiquiaari. Cuno jiyano-hua shanohua niquis-hano na cushishano toqueni, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaqui-jia naa shanohua niquishocoriqianotej. Jaara sorere, tariqui catijiashiya saniniuuri-jia pan ma-jeetetajara. Pueyaso jaara naa maniniushitiy-acuaa shuucuacatej, ¿majateeri na naata cushitiniu niajaniyajuhuaaj, jatarinitiaja Pueyasoocua tiuu-jiacanaa? ²⁹ Naaratej, nia sequeyanijia, maja nia tacaaniutia nia pajenu casaa nia miaquenu-taniyani, casaa nia ratunutaniyani. ³⁰ Pueyaso niishiyashijiaca pueyari pueyaracaanu na panis-hano casaacua tacaquiaa. Niajaniya cutaraari Queraca. Nojuacuajaari tari niishiya puetunu nia panishanojuanaa. ³¹ Naaratej, nia niishiri-ojore Pueyaso panishano nia miiniuria. Nojua-jaari saniniuujia nia niqutionutaniya puetunu nia panishanojuanaa.

*Nia casami nia racatare Pueyaso shuriucua
(Mt 6.19-21)*

³² 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniuucua, ¡nia niqutionutaniya puetunu na jii-tiasanojuanaari!

³³ Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamiijiuniucua pueya. Naa nia miishacaritij, niaari jiyocuacaanu racataa nia jiitiasano. Tee Pueyaso racataa nareja nera nia niqutiosanocuajani, cuniqui, nia cumaneeca quiquioori maja na piquiniu. Niaari tii nia racatasano jiitianutaniya pueyaracaanu. Majaari nohuasejovia na naata nocua tiuquiniu na nohuasenura. Naajuhuaaj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuaani.

Jeenucuasano nia quiri nia Jiyaniijiaacuaji

³⁵ 'Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. ³⁶ Naa jeenucuasano nia quiriijuhuaaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapuate na jiyaniijiaacuaji suteyajaani, na jiyaniijia cuara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque

maniniuqui jocuanutaniyari na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹ Nio nia niishirijuhua, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. ⁴⁰ Naajuhua, jeenucuasano nia quiri pueyanaa, juhua cuno sutejaca seyaja. Niaa jaara jiyaniya juhuanujuaja maja cua tiuquiniu quiniutianihua, janiyari jiyacari nia jiyajenetentaniyani.

Jesu pohuatasano maninia serujiniji, sesa serujinijinio

(Mt 24.45-51)

⁴¹ Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴² Jiyaniijiaari na riucuaaree:

—Tamonu seru jaara maninia seru quiri, nocua tiuushano, niishijiajuhua, na jiyaniijiaari cuno na seru jiyatenutaniya narta seya jiiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijiajanaa mianuutequiaa nojoricuaani.

⁴³ Cuno seruuri shuquiriaatia quiniutianiya na jiyaniijia jaara na riuriasuhua naa maninia miyanojua, taa na sequesaaquiaari na miiniuriacuajani. ⁴⁴ Seetanujuanaa

nia sequeyanijia, na jiyaniijiaari cuno maninia seru jiyatenutaniya puetunu na jiiitiasano casamijianaa cojuana na quiniuria. ⁴⁵ Saniniuujia, cuno seru jaara sesa miiniuria niishiriojore, na jiyaniishacari na jiyaniijiaari jiyanoehua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaaj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuaaj. ⁴⁶ Na jiyaniishacari na jiyaniijia juhuanojuaja maja na tiuquiniu quiniutianiuhua, jiyacaritij, cuno juucaja, na jiyaniijiaari tiuquiniutianiuhua canashiyaquiji. Naa cuno seru miiniuucua sesatej, na jiyaniijiaari jiyanoehua na saniitionutaniya. Na jatanutaniyari Pueyaso tojiyashijiaca pueyata na saniitiosocoriquiano.

⁴⁷ Tamonu jiyaniijia jaara na seru rootare maninia, taa nojuaja miiniutianiyanii, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanoehua majacusaanutaniya cutara. ⁴⁸ Saniniuujia, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuaaj, cante queraatia niquitiosaareeni, cuno serujinijiiri queraatia masenu panishaanutaniya. Naajuhuaaj, cante jiyatesaaree queraatia jiiitiana na quiniuriani, na jiyaniijiaari nocua tiuuniutianiya socua

jiiyanohua maninia miiijia na quiniuria.

Jesuucua tiuujiaaari narta pueya panishoo
(Mt 10.34-36)

⁴⁹ Mijiria niquiaarinijia, juhua mani cua noshi-tiniuria pueya tajinia. ¡Seetanujuanaa na noshi-tiriqquia tarinij! Cua rupaari juhua mani quiniutianiya. ⁵⁰ Coteenu, janiyari jiiyanohua saniniu-jiushaanutaniya juhua manitiani. Nocuaji coo-jiaari tacaya janiya jaara naa miishaarejaatijia. Seetanujuanaa na jiyateriquia tariucua tucua-teenonij. ⁵¹ ¿Niaateeri jiiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. ⁵² Naaratej, pueyari quiarijia juayonuutaniya. Pueyano jaara necocuata jiiitiare jiuujianaraca niquiohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiaaari saniniuujia nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacaresetanutaniya-jaacujua. Naacuajitij, tamonu tiajinia, quera-jaa pueyari caapiquiriyatu cucua tiuujiaa juaajiaa quiniutianiya. ⁵³ Pueyari necohua para-caajia quiniutianiya, necohua tiuushacari cucua. Naajuhuaaj, necohuari na que paracaajia quiniutianiya na que tiuushacari cucua. Naajuhuaaj, maajipohuari necojori paracaajia quiniutianiya necojori tiuushacari cucua. Naajuhuaaj, necojoriiri na nucua paracaajia quiniutianiya na nucua tiuushacari cucua. Naajuhuaaj, maajipohuari necohua niquiocohua paracaajia quiniutianiya,

necohua niquiocohua quiniuucua cucua tiuujia-aca. Naajuhuj, pueya niquiocohuari na quinia paracaajia quiniutianiyajuhuj, cucua tiuujia na quinia quiniuucua.

Pueya cuaara niishiiria quiarjia Pueyaso miishanojiniji, casaa na niishitiniu paniyani

(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuj:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari.

⁵⁵ Naajuhuj, paratu jaara piyarojoquiaa pananu shuucuj, niaari sequequiaa: “Tacareejonuqui quiniutianiya”. Naa quiquiaari. ⁵⁶ Pueyanaa, ¿niaateeri seetanujuanaa niishijia? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarjia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijia niajaniya.

Niaacuara tonujunata nia jecatoore

(Mt 5.25-26)

⁵⁷ Niaacuajaari niishiya, sesa miijiaaari sanitiisaanutaniya. Naaratej, tama niajanijaja nia niishiriojore, casaate maninia nia miiniuriani. ⁵⁸ Tamonu pueyano jaara quicuara tonujure quia sesonuucua na casaa, quia saniri juhujata nata pocoojonu maninia, na jaatucusacari quiajaniya nequesoreena pueyanoocua. Quia sequerenoj casaa quia miiniutianiya nerani, na

jiyanooniuria quiajaniya. Quiaa jaara jecatoy-aquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niqutionutaniya na pueya, quia nujuatesaanura nujuatejojuajinia.
⁵⁹ Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niqutiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquiiijio-quiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajininijio pueya puecoorucuaa! ¡Na nuhuaji, nojori nanaca cojitiriiri Pueyasooocuara nojori puecoosano seya nanacata!

² Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanoohua sesa miijiaca nojori quiniuucua narta Galilea pueyajiniji?

³ Seetanujuanaa nia sequeya cutaranijia, nojoriiri maja socua sesa miijiaca quiquianu niajanijajiniji. Niajanijajuhuaaj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaaj.

⁴ ¿Cuno dieciocho pueyariuhuaaj, canapuate cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiquianu

narta Jerusalén tiacajinia quiniaa pueyajiniji?
⁵ Seetanujuanaa nia sequeyanijia, nojoriiri maja socua sesa miijiaca quiquianu nijaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniuujiniji, niaari taraatia puecoosaanutaniyajuhuj.

Miriqui Jesu niishitiojosano muetuhuo naana-jiniji

⁶ Jesuuri na nuhuaji pueya niishitiojoquiaari nio miriqui pohuatasanota:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. ¡Quia nure! Tamonu cuaara na nujusaqui natasaaria, na muetunura cutara”. ⁸ Cuhariquia cojuanaari na riucuaaree: “Jiyaniijianaa, quia tarinitiarejaara tamonu marijia. Janiya na pajama jiya tacarotanutaniyani na sasetanura. Na nuhuaji, janiyari juunu cueaca na pajama paatiniutaniyani. ⁹ Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

Jesu jeecasacari porocuatucua samaatenu juuca

10 Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. 11 Tamonu maaji cusosuuri tii quiriquiaajuhuj. Dieciocho marijiaari na shoconujuquiaari porocuatú na quishacari. Samaruuri naa na jiyatequiaari. Majaari quenaaja na naata maninia nujuanu quijia. 12 Jesu jaara na niqiquiaari, na sequereeri:

—¡Maajiniaa miji! ¡Quia nijiniacuaja tari jeequerohua!

13 Jesuuri na juaashiquia niaree maajiicua. Jiyacaritij, maajiiri maninia jeequequee. Nojuajaari Pueyaso maniniuhuaqueetanu coteeree naa na miishaanuucuatej. 14 Pueyaso secojojua tiajinia jiyaniijiaari juaarii naa Jesu miiniuucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacuajaari quiya puetunu semaaniajanana pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

15 Jiyaniijia Jesuuri sequeree:

—¡Sapuenú juhua maninia miijiaca niqishano pueyanaa, puetunu niajanijajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura!

16 ¿Nio maajiiriuhuj? Nojuaja cutaraari supuetana Abraham niqiohuacuajinío supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuatú na quishacari.

17 Naa Jesu sequesacaritij, puetunu na paraajanaari caririquitiurii. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

*Miriqui Jesu pohuatasano mostaza jajaujiniji
(Mt 13.31-32; Mr 4.30-32)*

18 Jesuuri sequequiaari:

—¿Taate cua naata niishitiojonu niajaniyani, nia niishiniuria taa Pueyaso poonijiya pueya jiuujia-jinia na rupaatani? 19 Na rupaari juhua mostaza jajauniyojua, pueyano natasano na cuhuariquia-jinia. Cuno jajau jaara moritiare, puereetuu-cara caneyari. Naacuajitij, shuhuari na cashacu-cuaacua jesuya. Naajuhuaaj, Pueyaso rupaari caneya pueya jiuujiacajinia puetunu nio jiyajini-ajanaa maninia miijiaca nojori quiniuria.

*Miriqui Jesu pohuatasano pan poreetajajiniji
(Mt 13.33)*

20 Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? 21 Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhuaaj.

*Juhua shiitianiyojua tohuateyari quiya Pueya-soocua pa quianura
(Mt 7.13-14, 21-23)*

²² Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajiniaari, shiitianiyojua tiacajini-
anio. ²³ Jiyacaritij, tamonu pueyanoori na neque-
sotaree:

—Jiyaniijianaa, ¿saaja quenaaraqui pueyateeri
Pueyaso pueyara jiyatesaanutaniya?

Jesuuri nojori riucuaaree miriqui:

²⁴ —Jyanohua nia saniniujiuri shiitianiyojua
tohuateyaco nia tiuquiniuria, Pueyaso nia
rupuenura. Juhuacarijia nia numooteyanijia,
queraatia pueyari nocua tiuquitianu
paniniutianiya juucua. Majaari nojori naata
quiniutianiya saaja. ²⁵ Cua tojitiare. Tia camaru
jaara sanere, tohuateya tionutaniyari. Niajaniya,
cante na tia carijiniacuma quiyajaani, niaari
tohuateya piquiniuuniutianiya najuhuanaj.
Niaa jaara naa nacare: “¡Jiyaniijianaa, canaacuaji
quia riatare tohuateya!”, nojuajaari nia
riucuanutaniya: “Maja cua niishiniu tejenote
niajaniyani”. ²⁶ Jiyacaritij, niaari juhuacatecara
sequenutaniya: “¿Majateeri canaa quia niishiniu?
Canaacuajaari quiata miaquenuujuani. Canaari
quiata ratujua mariyatani. Quiaacuajaari
canaa tiaca nuucuacajinia niishitiojojua”.
²⁷ Tia camaruuri nia riucuanutaniya:
“Janiyacujaari tari nia sequereeni, maja
cua niishiniu tejenote niajaniyani. Nia
quiojorohua niiquiji, puetunu niajaniyajanaa
sesa miijiacanaa”. ²⁸ Naa na taanuusacari
niajaniyatej, niaari nujuquetunutaniya. Niaari
nia quiaca miaquenutaniya jyanohua nia
taraajenuta, nia niquishacari Abraham,

Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyanocuaa. ²⁹ Queraatia tamasaca pueyapueeri nijionutaniya puetunu jiyacajinijiniojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucujaji jiyacajinijinio, pananu muetasamaji miaquetajara jiyacajinijiniojuhuaj. ³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhujaji, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhua quijiaca quiniutianiya Pueyasora, nojori tojitiaquinuuucua nojuaja.

Jesu taraajesacari Jerusalén tiacajinia quiniaa pueyacua

(Mt 23.37-39)

³¹ Jiyacari noojiaqueya Fariseocuacaari Jesuu-cua tiuquiiijioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaaniuhujaji. Janiyari naa miya quiarijiani, tariquijiuhuaj. Janiyari tama tariqui tucatanutaniya puetunu

cua miiniu panishanojuanaani”. Naa nia sequesuhua cuno pueyano. ³³ Cuaara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaquiaaricuaani. Majaari tamaqui cua monu quishaanutaniya.

³⁴ 'Jerusalén tiacajinia quiniaa pueyanaa, ni-aacuajaari Pueyaso sequesano caminiujiuniaa puecoojuaca. Niaari Pueyaso jiyaramiquishano pueya jacujuaca saitia. Janiyari juucua pueyara-caanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura nia-janiya. ³⁵ ¡Cunora, cua tojitiare! Nia quiquioori tojetaarucuajanaa shaaqui quiniutianiya. Naa-juhuaj, majaari socua nia niquiniu quiniutianiya janiya, niaa jaara nia timitiasacari janiya sequere-jaatijia: “¡Cuaara shuquiriaatia quiiria pa Jiyani-ijia, Pueyasojiniji tiuquiuhuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. ² Jiyacaritij, tamonu pueyanoori Jesu tacoji nujuariquiaa, poreeno cusotaano.

³ Jesuuri Moisés Rootasanojiniji niishitiojona nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maniniate cusosu pa naataniniu samaatenu juuca?

⁴ Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. ⁵ Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masuushiyajaani-uhuj

⁷ Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

⁸ —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini. ⁹ Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanoocuai”. Naacujitij, quiaari cajitishaanutaniya quia caririquiniutia pueya paniyaquishano cajitiujinia, miaqueja

puequeetujinia. ¹⁰ Nocuaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajaniya, nojuajaari quia sequenutaniya: “Cua rupuenanaa, jniya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajaniyaqui nia masuuna panishano pueyano. ¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹² Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacuaja. Cunora, majaari socua quia masenu quiniutianiya Pueyasojiniji. ¹³ Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujanucua pueya, cariojuarujurinio. ¹⁴ Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya

saniniuujia. Naaratej, Pueyaso cutaraari maninia miiniutianiya quiajaniya saniniuujia, na samiitianijosacariuhua maninia miijiaca pueya.

*Miriqui Jesu pohuatasano na queranacunujiniji
(Mt 22.1-10)*

¹⁵ Jesuta cajiyano pueyano tojishacari naa Jesu pohuatasanotej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenutaniya jiyocuacaanuni!

¹⁶ Jesuuri na sequeree:

—Tamonu pueyanoori queraatia sumatuquiaari pueyata na queranacunura. No-juajaari coteenu queraatia pueya masuquiaari.

¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

¹⁸ ‘Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niquiniucucani. Cua jiyanoori quenaaja. Maja cua naata quianu quiata queranacunuucua”. ¹⁹ Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinia”. ²⁰ Tamonu masuusano pueyanoori sequerejuhuaj: “Shusha

camiriinjia. Cunora, maja cua naata quianu”.
²¹ Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijaari juaaqui. Na seru sequereeri: “Ritia quia quiaare tamasaca pueya masuunuucua tiaca nucuaacaco. Miji quia rijiocoo casamijiuniucua pueya, sesaruneca pueya, sesacujua pueya, cariojuarujuri pueyano”.
²² Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequeree janiyacujani. Juhuanajuaja maja tia mishiniu”.
²³ Na jiyaniijaari na sequeree: “Socua pueya quia pajecoo tiaca nucuaacaco, tamasaca tiacajiniara nucuaaconio. ¡Socua pueya quia nenecojocoo nojori niniuria, cua tia mishiniuria!”
²⁴ Seetanujanaa nia sequeyanijia, coteenu cua masuusano pueyajinijini, majaari quenaaja niquiriyatu nojorijinijinio saniniu quiniutianiya cua sumatusano”.

*Saaja tama na cuaqueya panitajajaarjia na naata Cristo nuhuajiniu
 (Mt 10.37-38)*

²⁵ Jiyanohua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

²⁶ —Cante cucua niya cua pueyano na quiniuriani, nojuaja cuara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujinijinio! Nia niquiocua, nia niquiohua, nia tapueyocuaca, nia rimiatuhajuhuj, nia

panishacari nojori socua janiyajiniji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiniji! ²⁷ Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸ Niaa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatnura puetunujuanaa? Naajuhuj, niaari niishiriojiya, queraatia quiyacujate nia cumaneeca. ²⁹ Niaa jaara coteenu naa miyaquiri, niaari najuhuana morijiucua nujuatejonutaniya, na nuhuaji majaari socua nia cumaneeca quiniu nia tucuatnura nia tia. Puetunu nia tia niquiniaajanaari juhuacatecara nia macatiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatnura quiarijia”. ³¹ Naajuhuj, jiya jiyaniijia jaara quianu paniri narta jiyaniijata miaquetoona, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Saniniujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootoonura. ³³ Naajuhuj, niaa jaara carteyaquiri puetunu nia jiiiasanojuanaa, majaari nia naata cua pueyanora nia quiniu.

*Miriqui Jesu pohuatasano shonijiniji**(Mt 5.13; Mr 9.50)*

³⁴ 'Shoni jaara tiquiriiquia quiya, maniniaari, pa panishano. Jaara shaacara quiquii, ¿taate na naata tiquiriiquiara na quiniuhuani? Maja na naata. ³⁵ Najuhuana quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria nataacuaca. Majaari quenaaja maniniajuhuaj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojitiaara miriqui cua pohuatasano. Cuaara na niishiiriajuhuaj. Seetanujuanaa cua tojitiajaca pueyani, nojoriiri juhua shoni mijiria.

15*Jesu pohuatasano miriqui tashucvano borregojiniji**(Mt 18.10-14)*

¹ Roma tiacajinia quijia jiyaniijiara cumaneeca masejonaa, mariyata sesa miijiaca pueyari Jesuucua nijioriquiaa na pohuatasano nojori tojitianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojonaa soosano pueyano. Cunora, Fariseocua-caari, mariyata Moisés Rootasanojiniji niishitiojonaari tama rimiaaqueturiquiaajaaja Jesuucua. Naa pocuaturiquiaa Jesuuri:

—Cuno pueyanoori sesa miijiaca pueya shanacuquiaa nocua nojori nijionura. ¡Juhuajaniya nojoritia miaquequiaajaarihuaj!

³ Naaratej, Jesuuri nojori niquiara pohuataree nio miriqui pohuatasano:

⁴ –Niaa jaara cien borregohua jiitariquia, no-jorijinijinio niquiriyatuniyojua jaara tashucua-re, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquia cuhuariquiajina, tashucuaano borrego nia pajenura, niaa cuara na riuriatarohuaajaatija? Taaquiririni. Niaacuajaari naa miiquiaaqui.

⁵ Niaa jaara na riuriatasee, niaari nia shuquiriniutia na paquiohua nia numueecuaji. ⁶ Niaa jaara na tiuquitiarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarija! ¡Tari riuriatarohua cua borregoniyojua tashucuanonija!” ⁷ Seetanujuanaa nia sequeyanija, naajaariuhaj, jiyocuacaanu quiniaari jiyano-hua shuquiritiuquiaa niquiriyatu sesa miijia jaara noojia tacatore sesa na miiniu-jiniji. Cuno pueyanoori socua jiyano-hua shuquiri-tiasano tamasa noventa y nueve pueyajiniji, canapuetucuaja tari maninia pueyacuaani.

Jesu pohuatasano miriqui juurequetesano cumaneejiniji

⁸ 'Naajuhaj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuara na riuriatarejaatija. ⁹ Na riuriatasacari na juurequetesano cumanee, maajiiri na rupuenaa, mariyata na shuriucua

quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” ¹⁰ Seetanujuanaa nia sequeyanijia, jiyocuacaanu Pueyaso seyari naa shuquiriquiaajuhuj sesa miiija jaara noojia tacatore sesa na miiniujiniji.

Jesu pohuatasano taa tamonu pueyano jiyanooquiaari neyanuni

¹¹ Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. ¹² Socua naatujuaari na que sequeree: “Cua quena, quiarjia cua niquitiore quia jiiatasanojiniji, quiria quiriqiano quiaa jaara shaajeyare”. Naacuajitij, na queeri puetunu na jiiatasanojuanaa niquitiojoree necohua. ¹³ Socua naatujuaari rupaquijia camueenujuquiaari na que tiajinia. Na nuhuaji, puetunu na que niquitiosanojuanaa nojuajani, nojuajaari saniniuujia tamasaca na niquitiojoree na cumaneecara. Na nuhuaji, na cumaneecata quiaquiaari tucuacaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarjianaa, cuno jiyajiniaari jiyanoohua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶ Mashajaari cushiya miaquesano miaquenu

paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. ¹⁷ Na nuhuaji, tama sequereejaarijia: “Cua queeri queraatia na tiajiniaaco seyaraca. Nojoriiri maninia miaquenuuquiaa taquiya. Nojori sumatuuri cureequiaajuhuj. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua tacateyarohuaraqij! Janiyacua na sequesuhuani: ‘Cua quena, janiyari Pueyaso miiquianu sesani. Janiyari sesa miiquianu quiajaniyajuhuj. ¹⁹ Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’”. ²⁰ Naa na niishiriojonu nuhuajitij, mashajaari quiaquiaariuhua na queecua.

“Tucuacaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuunsequereejaariuhuj. ²¹ Neyanuuri na que sequeree: “Cua quena, janiyari sesa miiquianu Pueyasoni, quiajaniyano. Majaari cua sequenu quia niyanuta”. ²² Na queeri saaja na tiaco seya sequeree: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijihuj! ²³ Pa ri-uutianishano juunu niquiojua nia quiacoo mosocoriquiano. Quiarijia pa queranacure. Pocua miaquenuureni, quiyanu pa shuquiritiasacari. ²⁴ Nio quiyanuniyojuaari juhua macu quiriquiaa. Quiarijia samiitiarohuari. Nojuajaari shaaje-

quiaari. ¡Tari pocua muetarohuari!” Naacuaajitij, nojoriiri juhuacatecara queranacuquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuni-uyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riucuaaree: “Quia nuhuajishanacuaaja tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. ²⁸ Jiyacaritij, jiyapueranuuri jiyanohua juaaquii. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijionu quiquiaa quiajaniya. Naa maninia tojijia cua quishacari quiajaniyatej, ¡majaari quia niquitionu quiquiaari janiya quenaaja niquiriyatu cabraniyojua, cua queranacunura cua rupuentaata! ³⁰ Quiarijia saniniuuja, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneece puecakanu paanatujuuriicua!” ³¹ Na queeri na sequeree: “Sanajanaa, quiaari pueyaracaanu cuata quiya. Puetunu cua jiiτίαςanojuanaari quia casaa. ³² Naajaa, quiarijiani, maninia pa queranacure.

Shuquiriaatia pa quirij. Quia tarajanuuri juhua macu quiriquiaa tari. Quiarijia samiitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

16

Miriqui Jesu pohuatasano pueyanojiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riutioriquiaa jiyasohuaja, tama nerajaaja. ² Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarijia cua niquitiore quia naajiotasano puetunu quia miishanojinijijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojoquee. Tama sequereejaarijia: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanohua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijosanojiniji jataaareni”. ⁵ Naaratej, nojuajaari naa

miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?”⁶ Pueyanoori na riucuaaree: “Cua niqutiojocanu cien patacocua mishaja shiyocuani”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”.⁷ Na nuhuaji, tamonu pueyano nequesotareeri: “¿Quiajaniyariuhuj? ¿Casaa cua jiyaniijia niqutiojocanu quiajaniyani?” Na riucuaareeri: “Cua niqutiojocanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”.⁸ Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanohua niishijia tama quia cuaqueyajaaja quia cojuanura!”

'Seetanujuanaa pueyanaa, Pueyaso niishiyashijiaca pueyari socua jiyanohua niishijiaca cuhuashiqui quijiaca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹ 'Naarate nia nacasuyanijia, naa capora nia quirijiuhuj, maninia nia miiniuria pueya. Maja nia casami nia jamuenu. Cunocuajaari nareja Pueyaso niqutiosano niajaniya. Naacuajitij,

capora nia quishacari mijiria jaara puequema, nia Jiyaniijaari nia tiuquinitianutaniya pueyaracaanu quishaqui jiyocuacaanu, jiyanohua na shuquiritiasacari niajaniya.

¹⁰ Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaaree secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhuj. ¹¹ Naajuhuj, niaa jaara maninia jiitiaaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocuacaanuji casami nia jiitiana. ¹² Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niquitiore niaarano na riuriotacani? Maja cutaraari nia niquitiosaanu quiniutianiya.

¹³ 'Poonitijosano pueyanoori maja na naata caapiqui jiyaniijiaraca poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquriryatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacuajitij, Pueyasoori maja na naata nia poonitijionu nera.

¹⁴ Fariseocuacaari jiyano hua cumaneeca panijia aca quijia. Naaratej, nojori tojishacari Jesu sequesano, nojoriiri saaja na rerequeteree. ¹⁵ Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niquishaanura. Pueyasocuajaari nioojia niishiya. Niaari pueya jiyajenetequiaa nojori jiyanishacari niaari Pueyaso panishano cutara, queraatia casami nia jiiatasacari. Saniniuujia, casaa pueya jiyatequiaa socua jiyano hua na panishanorani, Pueyasoori cuno soya cutara.

*Moisés Rootasanoori coteenu quiquiaari, quiar-
ijia quiya cutaraari quiarinio Pueyaso Rupaa*

¹⁶ 'Moisés Rootasano, mariyata puetunu tariucuacaanu Pueyaso sequenu panishano caminiujiuniasa pohuatasanojuanaari pueya tojitasocoriquiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojinijiiri pohuatasaaquiaa, taa Pueyaso jiyanooni paniya pueyani, na muerasu nojori quiniuria. Quiarijiani, puetunu pueyajanaari jiyano hua saniniujiya Pueyaso muerasu nojori quiniuria.

¹⁷ 'Nio jiyari shaajeriquiano, jiya cajiniocuanio. Saniniuujia, tariucuacaanu pueyara Pueyaso sequesano caminiujiuniasa pohuatasano cutaraari maja na shaajenu quiniutianiya quenaaja.

*Jesu niishitiojosano, pueyano carteyaquiniuria
necocua
(Mt 19.1-12; Mr 10.1-12)*

18 'Pueyano jaara necocua cartere tamonu maajitia na caminiuria, cuno pueyanoori jiyanoehua sesa miya Pueyaso niqiiara. Naajuhuaaj, cante cartesano maajitia camiyani, cunoori sesa miyajuhuaaj.

Jesu pohuatasano casamiriaca pueyanojiniji, Lázarojinijinio

19 'Casamiriaca pueyanoori quiqiiari. Jiyanoehua maniniuqui toqueya cushiyojojuaari, juhua jiyaniijianucua toqueya. Jiyanoehua na shuquiriniutia, puetunu juucajanaa queranacujuaari. 20 Jiyacaritij, casamiijiu pueyanoori quiijajuhuaaj. Jiyanoehua sapueyaraca. Nojuajaari cuno casamiriaca pueyano tia tohuatayaji niojotasano puetunu juucajanaa. Na sesaari quiijia Lázaro. 21 Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. 22 Na nuhuaji, cuno casamiijiu pueyanoori cusoqiiari. Pueyaso seyari na riquiaari supuetana Abrahamta na quiniuria, Pueyaso muerasurano shanoehua quiqiiojinia. Cuno casamiriaca pueyanoori cusoqiiariijuhuaaj. Jamosaaqiiariiri. 23 Sesa miijiacarano quiqiiojinia na quishacari, naqiiya na miishacari tii, nojuajaari mauqiiari. Cuniqiiiji tucuacaanu niqirii Lázaroori, shuquiriaatia quiyano supuetana Abrahamta. 24 Casamiriaca pueyanoori nacaree: "¡Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia!

¡Cua niti shiniajaquee quenaajacua! ¡Janiyari puera jiyanoehua naquiya miya nio manijiniani!”

²⁵ Abrahamri saaja na riucuaaree: “Sanajanaa, quia niishiri taa jiyanoehua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanoehua taraatia quiquiaari pueyaracaanu, jiyocua na quishacari. Lázaroori quiaritia niya cumanijiashiya.

Quiaari saniniuujia naquiya miishiyacujua. ²⁶ Naajuhuaaj, jiyanoehua tucuaa tacoori pa tajinia quiya. Cunora, cante niiquiji niuuniu paniya cuniquijiria quiocuani, majaari na naata. Naajuhuaaj, cante quia quiquiojiniji niuuniu paniya niiquijiriani, majaari na naatajuhuaaj”.

²⁷ Casamiriaca pueyanoori supuetana Abraham sequerohuacuahuaj: “Naa naasucuaaj cua supuetana Abrahamnaa. Naajaa, quia secojijanijia, Lázaroo quia jiyarorohua cua que tiajinia. ²⁸ Tii quiyajaari cua tapueyocuaca.

Cinco tarajanuhuaracanijia. Lázaroo cuara nojori numooteera, maja nojori quejoosaanurajuhua nio saniitiosaqui quiquiojinia”.

²⁹ Abrahamri na riucuaaree: “Nojoricuajaari Moisés Rootasano jiiitiaa, puetunu Pueyaso sequesano caminiujiunias naajiotasanojuanaanio. Quia tapueyocuaca cuara tojitiaara cuno”.

³⁰ Casamiriaca pueyanoori riucuaaree: “Naa naasucuatuhuaaj, cua supuetana Abrahamnaa. Naajaa, tamonu pueyano macunucuaajinijinio jaara muetarohua nojoriicua, nojoriiri noojia tacatonutaniya sesa nojori miiniuujiniji”.

³¹ Abrahamri saaja

na riucuaaree: “Nojori jaara Moisés Rootasano tojitianu paniyaquiquiaa, Pueyaso sequesano caminiujiuniaa naajionuutasanonio, majaari nojori tojitianu quiniutianiyajuhuj, macu pueyano jaara samiitiarohua”.

17

*Puereetaari quiniutianiya sesa miijiacara
(Mt 18.6-7, 21-22; Mr 9.42)*

¹ Na nuhuaji, Jesuuri na pueya sequequiaari:

–Mijiria, pueyari pueyaracaanu sesa miitishaaquiaa. Jiyanohua taraatia quijiaari cuno, cante sesa miitirii tamonuni. ² Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiara na jiyatenura niquiriyatu nio muerasuniyojuajinijinio.

³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

’Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniuucua quiajaniya, quia jiyanoorinioj.

⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

*Pueyasocua tiuujia pueyanoori jiyanhua
cumaacaraca*

⁵ Jesu saquiriojosano pueyari Jesu sequequiaari:

—Jiyaniijianaa, socua jiyanhua canaa quia tiuutiri Pueyasocua, socua cumaaca canaa jiitia-nura.

⁶ Jiyaniijia Jesuuri nojori riucuaaree:

—Pueyasocua nia tiuuniu jaara quiri quenaaja juhua mostaza jajauniyojua, jiyanhua shiitianiyojua, niaa jaara nio satuna jiyona sequere: “Ni-iquiji quia pacure. Moojinia quia nujuasee”, maara nia sequesano tojiri.

*Pueyasora poonijionatucua taa miijia
quiriquianij*

⁷ Niaa jaara seruraca quiriquia, nojuaja jaara tiajinia tiuquiriohua quia cuhuariquiaajiniji tee na namitariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhujaja”? ⁸ Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterejuhuj. Cua miaquenu nuhuaji, quiocua saniniuujia miaquerohua. Quiocua raturohuajuhuj”.

⁹ Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! ¹⁰ Naajuhuj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajajinijijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacuhuj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitaniyujua tiacajinia, diez pueya lepraraca cusosuhuari na naacuquiaari. Nojoriiri tucuacaanujijia Jesuucujaji nujuatusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia tarajere!

¹⁴ Jesu niquishacari nojori, nojori sequereeri:

—Nia cuaqueya nia niqutishii pueyacuara secjonaa, taa supuetana Moisés sequequiaaricujani.

Nojori canujuucuatúsacarijia, nojori cusonuuri shaajequee. ¹⁵ Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu cariquimiaji mojoquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinijinio tahue quiquiaari. ¹⁷ Jesuuri na pueya niquiara naa sequeree:

—¿Majateeri diez cusosuhua naatanijosaanu quirii? ¿Teeteeri narta naataconohua nueve pueyani? ¹⁸ ¿Saaja nio tahueteeri tacaterohua Pueyaso na maniniuhuaqueetanura?

¹⁹ Na nuhuaji, Jesuuri cuno tahue sequeree:

—Quia sanere. Quia quiaarohua. Quiaacuaja naatarohua cucua quia tiuuniuucua.

*Taa na quiniutianiyani, Jiyaniijia Cristo
tiuquishacariuhua*

(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijia na quiniuria mijiriani. Jesuuri nojori riucuaaree saaja:

—Pueyaso Jiyarosano jiitiasacari na muerasu, majaari namijiata niqushano. ²¹ Majaari na naata sequesaanu: “Niya quiya pa Jiyaniijia quiquio”, “Jati quiyaruhua”. Pueyasocuaajaari tari niya jiitiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquniuucua jiaatianutaniya niaata cua quiniuria rupaquijia, taa niaata cua quiya quiarjiacuaani. Majaari nia niquniu quiniutianiya janiya. ²³ Tamasacaari nia sequenutaniya: “¡Niya quiyacuaja nia Jiyaniijia!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuaani na nunujusacari.

²⁵ Saniniuujia, mijiria cua quishacarijia, janiyari coteenu jiyanohua naquiya miishaanutaniyani. Nio pa quishacari pueyari cua paniyaquiniutianiya. ²⁶ Quera cua tiuquniu panishacariuhua mijiria, naa quiniutianiyari taa

mijiria quiniaa pueya quiquiaaricuaa supuetana Noé quishacarini. ²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuca buquejinia. Canashiyaquiji, maruuri jiyanoehua niqiaari. Puetunu mijiria quiniaajanaari cusuquiquiaari pajaacajinia. ²⁸ Naa quiquiaarijiuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niquitiojojuaari. Na cuhاريquiaca natoojuaari. Na tiacara tiajojuaariuhua. ²⁹ Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niqiaari jiyocuacaanuji. Puetunu cuno sesa miijiacajanaari manijinia catequiaari. ³⁰ Naa quiniutianiyajaariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutianiuhuani.

³¹ 'Cuno juuca, pueyano jaara na tia cacojiria quiya, cuara roseyaquiiria na casamiicua tiajiniaaco. Naajuhua, pueyano jaara na cuhاريquia-jinia quiya, nojuaja cuara tacateyaquiuhua na tiajinia. ³² Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niquiniuucua, na casamiicua na taraajesacari. ³³ Cante saaja shuquiriaatia mijiria na quiniuria niishiriojuani, nojuajaari na nuhuaji jiyanoehua taraatia

quiniutianiya Pueyasooju. Saniniuujia, cante tama na cuaqueyajaaja panitiaja cua tojijiaara na quiniuriani, nojuajaari pueyaracaanu shuquiri-aatia quiijara jiyatesaanutaniya.

³⁴ 'Cua tojiri. Cuno niucujuhuj, caapiqui pueya jiuriatoosacari juucua na maquetujinia, niquiriyatujuaari rishaanutaniya jiyocuacaanura, Pueyaso pueyano na quiniuucua. Tamonuuri tiujiasaanutaniya saniitiosocoriquiano.

³⁵ Cuno juucajuhuj, caapiqui maajipohua riiquiniuushacari jatiqúi juucua, cucua tiuujiaari tarajanu shuriucujaji rishaanutaniya. Tamonuuri tiujiasaanutaniya saniitiosocoriquiano.

³⁶ Caapiqui pueya quishacari cuhuariquiajia, cua pueyanoori rishaanutaniya. Tamonuuri tiujiasaanutaniya saniitiosocoriquiano.

³⁷ Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pohuatasano niquishaanutaniyarini?

Jesuuri nojori riucuaanee miriqui:

—Tee casaa moqueyani, mohuari tii rerejiya.

Naajuhuj, majaari quenaaja niquiriyatu Pueyaso tojiyashijia cureenu quiniutianiya saniitiosoo.

18

Jesu pohuatasano mashiquiojiniji, pueya nequesoreena pueyanojinijinio

¹ Jesuuri na pueya pohuataquiaari nio miriqui pohuatasano nojori na niishitiojonura, nojori

cuaara Pueyaso secojoora pueyaracaanu, nojori taacanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejano. ³ Cuno tiacajiniaja tamonu mashiquioori quiquiaari-jiuhuj. Mashiquioori cuno nequesoreenaacua rucanejojua pueyaracaanu. Na secojojuaari sesa na miinia pueyano cuaara na niqutiohuara na casaa saniniuujia, sesa na miishanojiniji nojuaja. ⁴ Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucanejosacari, cuno nequesoreenaari socua tama sequequiaarijiaaja: “Janiyari maja Pueyaso puerejani. Janiyari pueya tojiyashijia cutarani. ⁵ Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶ Maninia na pueya niishiniuria na pahuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaari-iri, naajaa, nojuajaari maninia miiquiaari cuno mashiquiora. ⁷ ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyaajaara? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijiacaa pueyacuaaji. Sesa nia mi-

ijiacaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasoocua tiuujiaca riuriatanutaniya naa pueyaracaanu secojonuujucani?

Jesu pahuatasano miriqui Fariseo pueyanojiniji, Romano jiyaniijiara cumaneeca masejojua jinijinio

⁹ Jesuuri socua nio miriqui pahuatasano pahuataquiaari noo pueya niqiuara, canapuete tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasaca pueya soojea, nojori jiyaniishacari cuno pueyari socua sesa miijiaca nojorijiniji. Cunora, Jesuuri nojori niqiuara naa pahuataquiaari:

¹⁰ –Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijiara cumaneeca masejojua pueyanoori quiaquiaari Pueyaso na secojonura tiijuhuj. ¹¹ Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijiaca, maaji porocujuhuj. Naajuhuj, shuquiriaatia quiyaniija, janiyari maja sesa miijiani juhua nio pueyanouja niya cuata secojiyani, cumaneeca masejona pueyanoni. ¹² Janiyari caapiqui juuca miaqueyaquiquiaani puetunu semaanajanaa cua shuquiritiniuria quiajaniya. Naajuhuj, janiyari pueyaracaanu puetunu cua masesanojinijijianaa niqutioquiaa quiarani, taa Moisés rootaquiaaricujani”.

13 Cumaneeca masejonaari saniniuujia tucuacaanuji nujuasee. Na secojosacari, majaari quenaaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri. 14 Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoyaquishoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

*Jesu niasacari na juaashiquia conaajaacua
(Mt 19.13-15; Mr 10.13-16)*

15 Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jiiitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juaarii. 16 Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama

na cuaqueyajaaja juhua nio naatujuooriria.
¹⁷ Seetanujuanaa nia sequeyanijia, cante tama na
 cuaqueyajaaja jiyateyaquiya juhua naatujuooriria
 Pueyaso rupaacua na tiuuniuriani, cuno
 pueyanoori maja na naata Pueyaso muerasura
 na quiniu.

*Casamiriaca pueyano pocoojosacari Jesuta
 (Mt 19.16-30; Mr 10.17-31)*

¹⁸ Tamonu Judiocuaca camarnuuri Jesu neque-
 sotaquiaari:

—Maninia niishitiojonanaa, ¿taa cua
 miiniutianiyani, jiya puequesacari cua
 samiitianishaanura, pueyaracaanu quijiara cua
 quiniuria Pueyasotani?

¹⁹ Jesuuri na riucuaaree:

—¿Casaara quia sequeya janiya maninia
 pueyanotani? Saaja Pueyaso cutaraari
 seetanujuanaa maninia. Majaari socua tamonu
 quiniu. ²⁰ Pueyanonaa, quiaacuajaari Moisés
 Rootasano niishijia. Naa naajiotasanocujaari
 quiya: “Maja quia camishoo maaji numuetucunu.
 Maja monu. Maja nohuasenu. Maja
 tamonuucua saquiriojotanu quia sapojonuta.
 Quia que, quia nucua tojijia quia quiri”.

²¹ Pueyanoori Jesu riucuaaree:

—Janiyacujaari cua naatujuajiniji puetunu
 cuno tojijiajanaani.

²² Naa na sequesacaritij, Jesuuri na sequeree:

—Quiyajaari niquiriyatu casa quia miishoojua.
 Nio quia miiri: puetunu quia jiiitasanojuanaa
 quia niqutiojore cumaneecara. Na nuhuaji,
 casamiijiuniucua pueya cuno cumaneeca

quia niqutiojore nareja. Naacuajitij, quiaari jiyanoehua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³ Na tojishacari Jesu sequesano, nojuajaari jiyanoehua taraajequee, jiyanoehua queraatia casamiriaca na quishacari. ²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanoehua jiyajenetaari Pueyaso muerasu nojori quiniuria. ²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanoehua jiyajenetaari Pueyaso muerasu na jatanishaanura.

²⁶ Pueya tojishacari naa Jesu sequesanotej, nojoriiri naa na nequesotaree:

—¿Canteeri Pueyaso muerasura quiniutianiyanitioj?

²⁷ Jesuuri nojori riucuarree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijianaa, ¿canaarijiataj? Canaari puetunu canaa jiiatianojuanaa tiujiaquiaarini canaa nuhuajiniuria quiajaniya.

²⁹ Jesuuri na riucuarree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. ³⁰ Na nuhuaji, samiitianishano

quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

Jesu pacutesacari pohuatanu, nojuaja mosaanutaniya

(Mt 20.17-19; Mr 10.32-34)

³¹ Jesuuri saaja na doce saquirojosano pueya jiyataaree tamocora. Naa nojori sequereeri:

—Paari quiarjia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequesano caminiujiuniaa sequequiaaricuaaja janiyajinijini. ³² Naacuaajitij, janiyari tahua niqutiosaanutaniyani. Nojoriiri cua macaatiniutaniya. Taraatia cua miitiuniutianiyari. Cua riocojotunutaniyari.

³³ Cua piquitiuniutianiyajaariuhuj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuani.

³⁴ Majaari Jesu pueya niishiniu quiriquiaa que-naaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jecasacari cariyojuaru pueyano Jericó tiacajinia

(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariyojuaru pueyanoori nuu shu-ucuaaji cajiriquiaa, cumaneeca na masejonura pueya tajishacari nucuaco. ³⁶ Cariyojuaru to-jishacari queraatia pueya tajiyno, pueya nequesotareeri:

—¿Casaatejanojoni?

³⁷ Pueyari na sequeree:

—Nazaret tiacajinijinio Jesucuaaja tajiya.

³⁸ Cariyojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere que-naaja!

³⁹ Jesu puetanaa pueyari na juaarii na sanaa-janura juucua. Nojuajaari saaja socua jiyanohua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequeree cariyojuaru cuara jaatucusaaria nocua. Cariyojuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quia-janiyani?

Cariyojuaruuri Jesu riucuarree:

—¡Jiyaniijianaa, niquijiara quiniu panihuanijia!

⁴² Jesuuri na sequeree:

—¡Niquijiara quia quiriohua! Quia namijiacuaja tari jeequerohua cucua quia tiuushacari.

⁴³ Jiyacaritij, cariyojuaruuri maninia niquijiara quiquii. Jesu nuhuaji sacuaareeri na shuquiri-tianuta Pueyaso. Puetunu Jesu miishano niquini-aajanaari Pueyaso maninihuaqueetariquiaa.

19

Jesu pocoojosacari Zaqueota

¹ Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari.

² Cuno tiacajinia quiquiaariiri casamiriaca

pueyano. Na sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejonaa camarnu quiquiaari. ³ Nojuajaari Jesu niishiniu panijia juucua. Majaari na naata niqiniu quiriquiaa Jesu, puera jyanohua pueya quiniuucua Jesu shocua. Naajuhuj, Zaqueori puera posucuashi quijia. ⁴ Cunora, Zaqueori netequiaari Jesu tacoji. Nu shuucuaji sicómoro naanaacua macaseeri, maninia na niqiniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ritia quia rosemohua! Janiya quiarijia quia tiajinia maquenutaniyani.

⁶ Zaqueori ritia rosemohua. Jesu tiuquinitia-ree na tiajiniaari jyanohua na shuquiriniutia. ⁷ Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaar-ijia: “Cuno pueyanoori sesa miijia pueyano tiajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacuajitij, janiyari casamiijuniucua nareja niqutiojonutaniya puetunu cua jiiitasano cajiniocuajiniijianaani. Naajuhuj, janiya jaara puera cumaneeca masecanu tamasaca pueyajiniji cua sapojonutani, janiyari nojori niqutionutaniuhua socua jyanohua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocuaajaari supuetana Abraham niquiohuacuajinio supuenojuhuaaj. Nojuajaari cucua tiuurii taa Abraham tiuuquiaari Pueyasooocuacuaani. ¹⁰ Janiyacuajaari cunora mijiria niquiaarini, tashucuaano pueya cua pajenura, nojori cua jaariutianura Sesaaca.

*Miriqui Jesu pohuatasano diez cumaneecajiniji
(Mt 25.14-30)*

¹¹ Tii quiniaa pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jiyaniriquiaa Jesuuri Israel pueya jiyaniijiara quiniutianiya tari, Pueyaso muerasu na jüitianura mijiria. Nocuaaji, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuatareeri:

—Tamonu jiyaniijia niyanuuri quiquiaari. Nojuajaari tucuacaanu tamonu jiyajinia quiaquiaari jiyaniijiara na jiyatesaanura. Jiyaniijiara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niquitiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijiore, janiya cuaara tiuquiri-ohuajaatiinijiaj”. ¹⁴ Na nuhuaji quiaqueeri. Na jiyajinijinio pueyari maja na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori

sequenura: “Maja canaa paniniu cuno pueyano, canaa jiyaniijia na quiniuria”.

¹⁵ Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca.

¹⁶ Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niqutiosano cumanee janiya, janiyari socua diez cumaneeca reratecanuni”. ¹⁷ Na jiyaniijiaari na sequeree: “¡Maniniacuaja! ¡Quiaacuajaari maninia cua seru! Quiaari secaja cua niqutiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijiaara quia quiniuriani”. ¹⁸ Na nuhuaji, tamonu na seruuri nocua nimiaajuhuj. Nojuajaari na jiyaniijia sequeree: “Cua jiyaniijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni”. ¹⁹ Na jiyaniijiaari na sequereejuhuj: “Quiaari cinco tiaca jiyaniijiaara quiniutianiya”.

²⁰ Na nuhuaji, tamonu na seruuri nocua nimi-aajuhuj. Na jiyaniijia sequeeseeri: “Jiyaniijianaa, niya quia quia cumanee quia niqutiosano janiya. Janiyari na cojuacanu maniniani, toqueraujinia jiunicosano. ²¹ Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacua taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojua-

juhuaj”. ²² Na jiyaniijiaari na juaarii: “Sesaa-canaa, tama quia sequesanoajaaja janiyari quia nequesoreenutaniyani. ¿Naatee? ¿Quiaateeri ni-ishi-quianu janiyari pueyacua taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhuj? ²³ Quiaa jaara jiyaniquianu janiya naa miijiani, ¿casaara cua cumanee quia niqutioy-aquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriasuhuani, cua tiajina cua tiuquishacariuhua”. ²⁴ Cunora, na jiyani-ijiaari tii quiniaa pueya sequeree: “¡Cua cumanee nia jaariutiare cuno! Nia niqutiore cua maninia seru, cante diez cumaneeca jiiitaacua-jani”. ²⁵ Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jii-itiaa”. ²⁶ Jiyaniijiaari saaja nojori riucuaeree: “Seetanujuanaa nia sequyanijia, cante tari jiiitaani, nojuajaari socua niqutiosaanutaniya. Cante na jiiitaacuiyani, secaja na jiiitasanoori puetunujua-naa jaariutiasaanutaniya, cucua tiuyashijia na quiniuucua. ²⁷ Quiarijia, cua paraa saniniuujia, cuno pojori canapete cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruure-tajaca seque”.

Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetarecuhuj Jerusalén tiacajiniara. ²⁹ Jaara

cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhuj, Jesuuri caapiqui na pueya sequeree:

³⁰ —Cuno shiitaniyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuritanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucua: “Jiyaniijia na paniya”.

³² Jesu pueyari quiaaree. Nojoriiri na riuriatasee taa Jesu sequequiaaricujani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴ Nojoriiri na riucuaaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajjiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muejoquiaari nucuaco Jesuucujaji. ³⁷ Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuhuaqueetariquiaa puetunu na cumaacata na miishanojuanaa nojori niquiniuucua. Nojoriiri cunora jiyanojua shuqiritariquiaa Pueyaso. ³⁸ Nojoriiri naa nacooriaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡No-juajaari jiyanoehua maninia! ¡Pa shuquiritiarenoj!

³⁹ Cuniqúi pueya tajinia quiniaa Fariseocuaca tojishacari naa nojori sequesantej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequerejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuj. Taraatia quijianaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari. ⁴³ Cunora, na nuhajiiri jiyanoehua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniucujia. Naacuaajitij, quia paraari quiocua juhuacunutaniya na miaquejonura quiajaniya. ⁴⁴ Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia

caco maano. Quiaari naa miishaanutaniyatej quia niishiyaquiniuucua, Pueyasoori quiocua niqviaari najuhuanaj, quiocuaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojjua tiajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojjua tiajinia tiuquiquiaari na pueyata. Nojuajaari juhuacatecara pueya tohuatanijioree, canapueete na seya niqutiojoriquiaacuajani Pueyasooacara puecoosocoriquiano. ⁴⁶ Jesuuri nojori sequere:

—Tariucuacaanu Pueyaso Rupaajinia naa naa-jiotasaaquiaariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojjua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

20

Pueya nequesotasacari Jesu, cante na jiyaronani

(Mt 21.23-27; Mr 11.27-33)

¹ Tamonu juuca, Jesuuri Pueyaso Secojojua tiajinia niishitiojoriquiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaajuhuj, narta Judiocuaca camarucuanio.

² Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniiija quia quiniuriani? ¡Canaa quia riucuaare!
¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu panijajuhuj. Cua riucuaare. ⁴ ¿Cante Juan jiyaroquiaari na tiuquini-ionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaariija:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacanutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

⁷ Nojoriiri cunora Jesu riucuaaree:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janijajuhuj, majaari cua sequenu quiniu-tianiya niajaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijiaca poonijionaajiniji

(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu co-teerohuacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva natooquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia. ¹⁰ Uva quishacari noshuriujua, saniya cuhuariquia camarujua-naari na seru jiyaroree cuhuariquia cojuanaa pueyacua. Jiyarosaareeri tiji na masenura na camarurajanaa, uva carojotasanojiniji. Na camarujuaaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ꞑcuhuariquia cojuanaari na piquitiurii saaja! Na jiyaroturohua juhuasuuri. ¹¹ Cunora, cuhuariquia camarujuaaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuriiri. Na jiyaroturohua juhuasujaariuhuj.

¹² Cuhuariquia camarujuanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

¹³ 'Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaru niyanujuanaa niqirii nojoriicua niyano, tama nojorijaarjia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? ¹⁶ Seetanujuanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuagara naa miyaquiiriatej!

¹⁷ Jesuuri nojori niqinijioree. Nojori sequereeri:

—¿Naatee? ¿Nio naajiotasanooriuhua, tariucua-caanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia sojotanutaniya, nojori jyanishacari cuno saajia sesarujau. Na nuhuaji, cuno saajiaari socua panishano saajia jiyatesaanutaniuhua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jiitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaca pueya.

Jiya jiyaniijia cuara niquitiosaaria na seque-sano cumaneeca

(Mt 22.15-22; Mr 12.13-17)

²⁰ Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niquitiosaaquiaari saniitosocoriquiano. ²¹ Naacuaajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuaaj, majaari rimiajata quia niquiniu pueya. Quiaacuajaari seetanujuanaa niishitioj-quiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojoora nera, na jiitiasano pueya pa quishacari. Naaratej, ¿maniniateeri pa miiniuria na sequesano?

²³ Jesuuri niishi-quii nojoriiri nojuaja nequeso-tariquiaa najuhuanaj, nojori sapojonuta. Cunora, nojori sequereeri:

²⁴ —Cua niqutiri quia cumanee. ¿Niooriuhuaaj? ¿Cana naaquititi nocuani? ¿Cana sesate nocua naajiotasanoni?

Jesu riucuatereeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhuaaj.

²⁵ Jesuuri nojori sequereeri:

—Jiyaniijia César cuaara tama na casaajaaja niq-uitiosaaria. Nojuacuajaari na camaru. Saniniuu-jia, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucuasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucuasacari saaja maninia nojori. Naacuaajitij, nojoriiri socua sanaajetaree.

*¿Paate samiitiaconutaniuhuani?
(Mt 22.23-33; Mr 12.18-27)*

²⁷ Na nuhuaji, noojiaqueya Saduceocuacajini-jinioori Jesuucua niquiaari. Saduceocuacaari jiyanjia macunucua pueya maja na samiitia-conu quiniutianiuhua. Naaratej, nojoriiri Jesu sequeree:

²⁸ —Niishitiojonanaa, supuetana Moiséscaajaari pa rootaa na naajioneejina, pueyano jaara cusoyare mueyaju, tarajanu cuara camiria mashiquio, mueya na mueratenura tarajanu niti.

²⁹ Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuojua.

³⁰ Cunora, na nuhuajishanaari na mashiquio camirii. Nojuajaari muetuhuojua cusoquiaarijuhuaj. ³¹ Naaratej, neyaca tarajanu-uri mashiquio camiquiaarijuhuaj. Nojuajaari muetuhuojua cusoquiaarijuhuaj. Puetunu cuno mashiquiorijianaari naa camyoquiaari cuno maajitia. Puetunu nojorijianaari cusuquiciaari muetuhuojua.

³² Na nuhuaji, pueya mashiquioori shaajequiaarijuhuaj. ³³ Naacuaajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani? Cuno mashiquiocuajaari puetunu cuno siete pueya niquiocua quiquiaari.

³⁴ Jesuuri nojori riucuaaree:

—Mijiria pa quishacarijia, canuu, maajipohuari camyoquiaa. ³⁵ Saniniuujia, majaari noo pojori camiyonu quiniutianiya canapuate samiitianijiosaanutaniuhuacuajani, maninia quijiaca nojori quiniuucua Pueyaso niquiara mijiria.

³⁶ Majaari nojori shaajenu quiniutianiuhua. Nojoriiri shaajeyashijiaca

quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujuanaa quiniutianiya cutara.

³⁷ Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸ Naacuajitij, paari niishiyani, puetunu Pueyasocua tiuujiaa shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuajaari saminiucua quiya nera cutara.

³⁹ Noojiaqueya Moisés Rootasanojiniji niishitiojona pueya tojishacari naa Jesu sequesantej, nojoriiri Jesu sequeree:

—Maniniacuajaari quia sequesano, Niishitiojonanaa.

⁴⁰ Naa Jesu rihuanesacari saaja maninia nojoritij, majaari socua pueya nequesoreenu paniniu quiri quiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹ Jesuuri naa nojori nequesotaree saniniuuja:

—¿Casaara na sequesaaquiaacuaraarini, Pueyaso Jiyarosanonaari supuetana David niquiohuacuajinio supuenutaniya?

⁴²⁻⁴³ Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuara quia paraa shocotare puetunujuanaajaatijia’ ”.

⁴⁴ ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijiaata”.

Cuno pueyari maja na naata na riucuanu quiriquiaa.

Jesu numootesacari na pueya, Moisés Rootasanojiniji niishitiojonaa pueyacuaji (Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojitiasacarijia Jesu, Jesuuri naa na saquiriojosano pueya sequeree:

⁴⁶ —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanijosacari tiaca jiuujiajinia curotasano cajitiucujinia. Nojoriiri socua panishano cajitiucujinia cajiniu maniniucuaquiaa Pueyaso Secojoua tiajinia, tamasaca tiajiniajuhuj, nojori jaara masuusaare queranacunura. ⁴⁷ Naajuhuj,

nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuana tucuyocua secojoquiaa Pueyaso, pueya jiyaniinuria nojori maninia pueya cutara.

Naa nojori miiniuucuatej, nojoriiri jiyanohua saniitosano quiniutianiya.

21

Casamiiju mashiquio niqitiosacari na cumanee juuranee Pueyasora

(Mr 12.41-44)

¹ Pueyaso Secojoua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niqitiosano Pueyasora. ² Jesuuri tamonu casamiiju mashiquio niquiriijuhua caapiqui cumaneeniyojua niaano tiijiuhuj. Na niasanoori nareja cobrejiniiji shipinishano cumaneeca quiquiaari. ³ Jesuuri na pueya sequeree:

—Seetanujuanaa nia sequeyanijia, cuno casamiiju mashiquioori socua queraatia niqitioree Pueyaso, cuno casamiriaca pueyajiniiji. ⁴ Puetunu cuno pojorijianaari saaja na cureeno cumaneecajiniiji niqitiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqitioree.

Jesu pahuatasacari, Pueyaso Secojoua tia niyartasaanutaniya

(Mt 24.1-2; Mr 13.1-2)

⁵ Noojiaqueya tii quiniaa pueyari pocooriquiaa Pueyaso Secojoua tiajiniji. Jiyanohua shanohua saitia shipinishano quiriqiaari. Nojoriiri na shootiariquiaa, naajuhuj taa na maniniushitishaaquiaari nareja pueya

niquitiojosano casamitiani. Jesuuri nojori sequere:

⁶ –Puetunu cunojuanaa niaa na niquiyani, tamacari niyartasaanutaniyari. Majaari que-naaja tamonu saajia cureenu quiniutianiya tamonu caco maano. Puetunu niyartasaanutaniyanaari.

Taa nio jiya puequenu panishacari quiniutianiyani

(Mt 24.3-28; Mr 13.3-23)

⁷ Na pueyari Jesu nequesotaquiaari:

–Niishitiojonanaa, ¿taacari nio tia niyartasaanutaniyarini? ¿Casaa canaa niquiniutianiyarini, canaa niishiniuria quia sequesanoori quera tohuateya?

⁸ Jesuuri nojori riucuaaree:

–Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca. ⁹ Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara juaatiooquiaa tama nojori jiyani-ijia nojori jatanurajaaja. Naa quiniutianiyari coteenu. Naajaa, juhuanajuaja maja nio jiya puequesacari.

¹⁰ Jesuuri naa nojori pohuatariquiaa socua:

–Tamonu rupaa pocuajacaari miaquetoojonutaniya tamaatia rupaa pocuajacata.

Naajuhuaaj, tamonu jiyajinijinio jiyaniijiaari miaquetojonutaniya tamonu jiyajinijinio narta jiyaniijiata. Naa queraatia miaquetojonuuri quiniutianiya.

¹¹ Rijaari jiyanohua jiuuquiujutianutaniya queraatia jiyacajinia. Jiyanohua miaajenuuri quiniutianiya queraatia tamonu jiyacajiniajuhuaaj. Paaqueja cusonuuri quiniutianiya niya, tamaquiicuajuhuaaj. Naajuhuaaj, jiyanohua puereeta casaari niquishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² 'Cuno puereeta quiyaquishacarijia, niaari quiosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuujua tiajinaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanuucua janiyajiniji pueya niquiara.

¹³ Naacuajitij, nia naata cuno jiyaniijianucua niquiara pohuatanu janiyajiniji.

¹⁴ Nioojiaca nia cajitiri, maja juhuacarijia nia niishiriojonura taa nia riucuanutaniya nojorini.

¹⁵ Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jiyanohua cua niishitiajatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya.

¹⁶ Jiyacarijiuhuaaj, tama nia queyajaarijia nia tacartanutaniya, cua pueya

nia quiniuucua. Nia tapueyocuacaari nia tacartanutaniyajuhuaaj, nia jiyasooquajinio supueno pueyajuhuaaj, nia rupuenaanio. Nojoriiri noojiaqueya niajanijajiniinio puecoonutaniya.

¹⁷ Puetunu mijiria quiniaa pueyajanaari nia niquniu paniyaquiniutianiya cua pueya nia quishacari. ¹⁸ Naajaa, majaari nia puerenu. Majaari quenaaja niquiriyatu miesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia miesu cojuaacuaa, ¿maatucua casaara cojuaaquiri saniya niajanijani? ¹⁹ Naaratej, rejeretajaca nia quiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa niajanijaniya.

²⁰ 'Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano.

²¹ Jiyacaritij, canapuate Judea jiyajinia quiyani, cuno pojori cuaara mashiiria tuhuananuhuacua. Canapuate Jerusalén tiacajinia quiyani, nojori cuaara ritia mashiiria tiji. Canapuate na cuhuariquiajinia quiyani, nojori cuaara tacateyaquiuhuaara Jerusalén tiacajiniohua.

²² Cuno quishacari, jiyanohua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenu-taniya. ²³ Jiyanohua taraatia quiniutianiyari noo maajipohuara, canapuate manajaatohua quiya jiyacarini, mariyata canapuate conaaja supueja jitiaani. Jiyanohua naquiya quiniutianiyari cuno quishacari nio jiyajinia. Nio jiya pueyari

jiyanohua saniitiosaanutaniya. ²⁴ Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriguiano. Taucuacaari Jerusalén tiaca jitianutaniya tama nojoririjaaja, Jerusalén tiaca nojori jitianu cuara puequerejaatijia, taa Pueyaso sequequiaari tamajacuajani.

*Taa na quiniutianiyani Jesu tacatesacariuhua
(Mt 24.29-35, 42-44; Mr 13.24-37)*

²⁵ 'Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaj. Shoniniacu caminiaacuaji shiriiquitiuniutianiyajaariuhuj, jiyanohua na queyocuasacari. Nojoriiri cushitiiniutianiya na pueretunutajuhuj, jiyanohua cojuata shoniniacu caminia cajiniuucuasacari.

²⁶ Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jiyanohua. ²⁷ Jiyacaritij, mijiria quiniaari cua niquitiuniutianiya cohuaja najacajinia niyano, jiyanohua shacantuca cua cumaacata. ²⁸ Naaratej, niaa jaara nio cua pohuatasano niquiri tari coteyano, niocua tama cumaquitioorejaaja. ¡Niocua timiri! ¡Niacuajaari quera rijiosaanutaniya niiquiji, pueyaracaanu cuata nia quiniuria!

²⁹ Jesuuri nojori pohuataree nio miriqui pohu-
 atasanojuhuaj:

—Higo naana nia niquiri, tamonu jaranacujua
 naanano. ³⁰ Na jaamasucua jaara mueratuure,
 niaari niishiya, tacareejonuqui quera
 quiniutianiya. ³¹ Naajuhuj, niaa jaara
 puetunu cua pohuatasanojuanaa niquiri
 tari tohuateyano, niocua jiyacari niishiri,
 janiyari quera tiuquiuhuani, Jiyaniijijanaa cua
 quiniuria.

³² 'Seetanujuanaa nia sequeyanijia,
 puetunu cua sequesanojuanaari tohua-
 teenutaniya Pueyaso tojitiaashijiaca pueya
 puequeyaquishacarijia. ³³ Jiya cajiniocua, mariy-
 ata nio jiyari shaajenutaniya. Cua sequesanoori
 saniniuujia puetunu tohuateenutaniyajanaa
 cutara, taa cua sequeyacuajani.

³⁴ 'Tama nia cuaqueyajaaja nia cojuare
 niaa mariqui cua tojiyashijiacara quiriohuari.
 Naaratej, majaari shuquiriaatia nia quiniu
 paniniu juucua nia queranacunuunuta,
 nia mashaasequejonuta, mijiria casaacua
 nia niishiriojonutano. Maja naa nia
 quiniu, janiya mariqui nia cariyatureeri,
 jeenucuasoo nia quishacari, canashiyaquiji cua
 tiuquishacariuhua. ³⁵ Cua tiuquishacariuhua,
 juhua norijiotaja quiniutianiyari puetunu
 mijiria quiniaa pueyarajanaa, taa norijiotaja
 canashiyaquiji majaacuaani. ³⁶ Cunora, cucuaji
 jeenucuasano nia quiri juhuacarijia. Pueyaso
 nia secojore pueyaracaanu, maja naquiya nia
 miishaanura cuno taraatia quishacari, taa
 cua sequeyacuajani, mariyata juhuajaniya nia

nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojojua Pueyaso Secojojua tiajinia. Saniniuujia, niucua quiojojuaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura

(Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanohua queraatia pueya paniniuucua Jesu.

³ Jiyacaritij, Satanásri Jesu pueyano Judas Iscariote jiuujiajinia tiuquiquiaari. ⁴ Nojuajaari pueyacuara secojonaa jiyaniijianucuaacua quiaquiaari, Pueyaso Secojojua tia cojuanaa jiyaniijianucuaacuajuhuj. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵ Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶ Judasri jaarajaaja nojori sequesano tojirii. Jiyacaritij,

Judasri juhuacatecara niishiriojoquiaari taa na quiatenutaniya Jesu jiyasohuajani.

*Jesu miaquesacari na nuhuajiria na pueyata
(Mt 26.17-29; Mr 14.12-25; Jn 13.21-30; 1 Co
11.23-26)*

⁷ Poreetajaaju pan miaquenu juucaari tari quiquiaari. Cuno juucajuhuaj, borregoori mosano quijia, Pueyaso niquiara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarjia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaaree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹ Cuno tiajinia na tiuquishacari, niocua cuno tia camaru sequeese: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarjia Pascua niucuan?’ ” ¹² Nojuajaari nia niquitiniutaniya puereetuca sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquiriojosano pueyata caji-tiushii miaquejajinia. ¹⁵ Jesuuri nojori sequereee:

—Janiyari jiyanhua niaata miaquenu paniriquiaa nio Pascua niucyani, pueya moyaquishacarijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijiajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa. ¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijiajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secoree nocuaraari. Na neecasereeri. Na pueya na niqutiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhua. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ 'Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa miishaanutaniyani taa janiyajiniji juhuacarijia pohuatasaaquiaaricujani tariucuacaanu Pueyaso Rupaajinia. Saniniuujia, cua tacartanaari jiyanoohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoretooree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonuutariquiaajaacujua, teyano nojorijinijiniote jiyaniijajanaani.

²⁵ Jesuuri nojori sequeree saaja:

—Mijiria, jiya jiyaniijanucuaari jiyanoohua jiyaramiquiniu niishijia nojori jiiiasano pueya, juhua nojori poonitijosano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. ²⁶ Niajaniya saniniuujia, majaari naa nia quiniu juhua nojorijia. Cante socua tojishano pueyano quiya niajaniyajinijinioni, nojuaja cuara tama na cuaqueyajaaja jiyateyaquiiria na cumaaca paaretaja pueyacua. Cuara quiiria jacaria pocuaja. Naajuhua, cante

jiyaniijiajanaa quiya niajanijajininioni, nojuaja cuara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijiajanaani? ¿Miaqueyano pueyanotee? ¿Na mi-anuutena soj? ¡Miaqueyano pueyanocujaja! Naajaa, janiyari juhua nia seru quiquiaa niaarani, maninia cua miiniuria niajanija. Naajuhuj, naa maninia miijiaca nia quiriquia.

²⁸ 'Niaacujajari pueyaracaanu cua cojiriquiaa janiya jaara saniniujiushaariquiaani. ²⁹ Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰ Naacujajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuj, Jiyaniijiajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreena nia quiniuria.

Jesu sequesacari Pedro, nojuaja nocuaji see-tanutaniya

(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara se-querucuaa Pueyaso, jyanohua na saniniujiuniuria niajanija. Naacujajitij, niaari jyanohua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. ³² Janiyari saniniuujia Pueyaso secjoree quiocuara cutarani Simónnaa, cucua tiuuniu quia tarinitiaaquiniuucujaji. Naacujajitij, quiaa jaara quioojia tacatorohua cucua, quiocua

quiarta pueya cumaquiriohuajuhua, nojori tiu-niuria seetanujuanaa pueyaracaanu cucua.

³³ Simónri Jesu sequeree:

—¡Cua Jiyaniijianaa, quiaa jaara nujuatejojua-jinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajaniyajuhua!

³⁴ Jesuuri na sequeree:

—Pedronaa, seetanujuanaa quia sequeyanijia, caacaraja niunijyaquishacarijia quiarijia, quiaari tari naa cucuaji seetanu caminiujiu-niutianiya pueya niquiara: “¡Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquioju, sapatuujuño, ¿niaateeri nia panishano casaa niqutioyaquishaaquiaari?

Nojoriiri Jesu riucuaaree:

—Maja. Canaacuajaari puetunu canaa panishanojuanaa niqutiojosaaquiaarini.

³⁶ Jesuuri nojori sequeree:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhua. Cante nijinia-quetucuaja mueruu jiiitiaaquiyani, cuno cuaara niqutioora na shiniquiaacuaji toque, nijiniaquetucuaja mueruu na masenura na toque samitia.

³⁷ Seetanujuanaa nia sequeyanijia, tariucuaaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori

naa sequeyatej: “Nojuajaari jiyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

³⁸ Nojoriiri Jesu sequeree:

—Jiyaniijianaa, niya quiya caapiqui nijiniaquetucujaja mueruu.

Nojori riucuaareeri:

—Tariucujaja.

Jesu secojosacari Pueyaso, Getsemani cuhuariquijinia

(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jiitiquiaari. Na saquiriojosano pueyari na nuhuajiyaree. ⁴⁰ Na tiuquishacari tii, Jesuuri nojori sequeree:

—Pueyaso nia secjore, niaa mariqui sesa miiri-iri niaa jaara saniniujiushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojuquetasee Pueyaso secjonu-raari. ⁴² Naa secjoreeri:

—¡Cua Quenaa, maja cua miiniu paniniu naquiya! Naajaa, janiya cuara miyaquishaaria taa cua paniyani. Janiya cuara miishaaria cutara taa quia panyacuajani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴ Jesuuri jiyanohua naquiya miiriquiaa. Noojaari quera jiaqueriquiaa na tacaaniutia. ¡Jiyanohua, jiyanohua

secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. ⁴⁵ Na secojonu nuhuaji, Jesuuri sanerohua. Na pueyacua tacateyaru-huari. Nojori niquishuhua maquetiuyano saajaari, puera nojori taraajenuucua. ⁴⁶ Jesuuri nojori sequeree:

—¿Casaara nia maquetiuyani? Nia saneecua-ture. Pueyaso nia secojore na cojuanura nia-janiya, maja sesa nia miiniuria niaa jaara sanini-ujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷ Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiri-ojosano pueyajinijinio quiquiaari. Judasri Jesu-ucua nimiaajanaa. Na saruhuataseeri na nuju-unuta. ⁴⁸ Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niquishacari casaa cuno pueya mi-iniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinijinioori pueyacuara seco-jonaa jiyaniijia seru pirii na mueruuta. Saaja na miaquetajara numoco jaatereeri. ⁵¹ Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secojonaa jiyaniijianucua, Pueyaso Secojoua tia cojuanaa

jiyaniijianucuajuhuj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucuaaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? ⁵³ Pueyaracaanu cua quishacari niaata Pueyaso Secojojuaja tiajinia, majaari nia quianu quijia janiya. Naajaa, quiarijia cutaraari nijaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa.

⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajitiuriuhuari. Pedroori nojori tajinia cajishiijuhuaj. ⁵⁶ Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootiariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷ Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquiriijiuhuaj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijinijinio pueyanojuhuj!
Pedroori saa sequereejaa:

—¡Maja, pueyanonaa! ¡Janiya maja nojorijinijini-
ioni!

⁵⁹ Pasaja na tarishiniu nuhuaji, tamonu
pueyanoori sequenu pacuterohua:

—Nio pueyanocujaari cuno pueyanota quijia.
Nojuajaari Galilea jiyajinijiniojuhuaj.

⁶⁰ Pedroori saa sequereejaa:

—¡Pueyanonaa, maja cua niishiniu quenaaja
casaa quia sequeyani!

Pedro pocuasacarijia, jiyacaritij, caacarajaari
niunijioree. ⁶¹ Jiyaniijia Jesuuri tacatequee. Na
nijiniara niquirii Pedroori. Pedroori jiyacari
Jiyaniijia sequesano nojuaja niishiquii, naa na se-
quesanotej: “Quiaari tari seetanu caminiujiuniu-
tianiya janiyajiniji pueya niquiara, caacaraja ni-
unijiyaquishacarijia”. ⁶² Pedroori cuniquiji tohu-
ataquee. Jiyanohua nujuquereeri na taraajenuta,
sacuraatia na seetanuucua.

Pueya macaatishacari Jesu

(Mt 26.67-68; Mr 14.65)

⁶³ Jesu cojuanaa pueyari Jesu macaatiriquiaa.
Nojoriiri na piquitiuriquiaa. ⁶⁴ Nojoriiri Jesu
namijia morotuquiaari coteenu. Na jiquioco piq-
uitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa seque-
turiquiaa na macaatiniuria Jesu.

*Judiocuaca jiyaniijianucua nequesoreesacari
Jesu*

(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camaru-cuaari rerejoree pueyacuara secojonaa jiyani-ijianucuata, mariyata Moisés Rootasanojiniji ni-ishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiriirinij”, niaari saaja cua sequenutaniya: “Quiaa sapo-jiya”. ⁶⁸ Saniniuujia, janiya jaara nia neque-soreere Pueyaso Jiyarosanojinijini, majaari nia riucuanu quiniutianiya janiya. ⁶⁹ Naajaa, quiar-ijiani, janiyari puetunu cumaacaraca Quijijanaa miaquetajara cajiniutianiya jiyocuacaanuni.

⁷⁰ Naa Jesu sequesaciritij, puetunu nojori-jianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiriirinij. Naacuaaquiniatejaj, taa nia sequeyacuajani.

⁷¹ Nojoriiri tama sequetooreejaaja:

—¿Paatucua casaara socua tamonu pueyano pa-jere nocuara tonujuriquianoni? Paacuajaari tari tama pa numaatajaaja sesa na sequesano tojitia-reeni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaaji, puetunu nojorijianaari saneta-ree. Jesu jiyatatiuyareeri jiyaniijia Pilatoocua.

² Cuniqui, nojoriiri juhuacatecara Jesuucua saquiriojotaree na sapojonuta. Pilato seque-
tureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojoquiaajuhuaaj, maja canaa Israel pueya niqutiojonura canaa cumaneeca pa jiyaniijiajanaa Césarra, taa César sequequiaaricua-jani. Naajuhuaaj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiriirinij. Naacuaaj, taa quia sequereecua-jani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miiijia.

⁵ Nojoriiri saaja socua jiyacaterree Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucuaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niquniuucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niquniu panijia juucua. Naacuajitij, na niquishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. ¹⁰ Pueyacuaara secojonaa jiyaniijianucuaari tii quiriquiaajuhuaaj, Moisés Rootasanojiniji niishitiojonaanio. Cuno pojoriiri jiyanhua Jesuucuaara saquiriojotariquiaa queraatia sesa casaa. ¹¹ Herodesri na soldadohuata Jesu rerequeteriquiaa. Na macaatiiri. Na cushitirii jiyanhua shanhua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹² Herodesri cuno juuca Pilato rupuenara quiquiaari. Coteenu, majaari nojori niqutioonu paniniu quijia. Nojoriiri saaja shocotetoojua.

Puetunu pueyajanaa sequesacari Jesu cuaara mosaaria

(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhuj, tii quiniaa pueyano. ¹⁴ Nojori sequereeri:

—Niaari nio pueyano jaatucuree cucua najuhanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niquiarani. Niaacuajaari cua tojitiariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanojuanaari maja seetanujuanaa. ¹⁵ Jiyaniijia Herodesquiiri tari niishiyajuhuj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiqianu na mosaanura. ¹⁶ Janiyari na majacutenutaniya narejani, cartesaarohuari.

¹⁷ Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miiquiaari pueyara-caanutej, pueya na shuquiritiniuria. ¹⁸ Jiyacaritij, puetunu pueyajanaari juhuacatecara jiyanohua nacaree jatiqui:

—¡Jesu quia more! ¡Barrabás quia cartere sanini-uujia!

¹⁹ Tariijia cuno Barrabásri narta nasojosano Judiocuacata Romano pueya taanuuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoorohua socua. ²¹ Pueyari saaja jiyacaterree jiyanohua nacoonura jatiqui:

—¡Cuaara mosaaria niyacutesanojinia teetesano!
¡Cuaara mosaaria!

²² Pilatoori pueya sequenu pacuterohuacuhuj:

—¿Maatucua casaara mosaarejaarani? ¿Sesa miiriitijaaraj? Janiyacuajaari tari na nequesoreereni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³ Pueyari saaja socua jiyanhua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanhua nacooriguiaa. Puera jiyanhua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri.

²⁵ Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanojuhuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari
(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. ²⁹ Na nuhuaji, jiyanhua taraatia quishacariiri quiniutianiya niaara, jiyanhua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuni, mariyata cante mueya supueteyashijianucujaniuhuj”. Mueyaraca maajipohuari jiyacari jiyanhua taraajenutaniya, nojori niquishacari necohua miishacari naquiya. ³⁰ Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitaniyujua tuhuananuhua sequenutaniyari: “¡Canaacua nia tiyare canaa nia jamonura!” ³¹ Jiyacariiri jiyanhua naquiya miishacari quiniutianiya. Quiaritia, janiya jaara naa naquiya miishiyacuaani, ¿taaquitijia Pueyaso tojitiaashijiaca miishaanutaniyatejaj?

³² Caapiqui sesa miijiacaari jaatucunuusaariquiaajuhuj, mariyata tetejoscoriguiano Jesuta. ³³ Nojoriiri puecoosaqui tiuquijiosee. Cuniqui pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari tetejosaareejuhuj,

niquiriyatu na miaquetajara, tamonu na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Ma-jaari nojori niishiniu casaa na miitiuyani.

Na nuhuaji, soldadohuari saitia tacuar-ishijioree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaa-jaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuara roseera niyacutesanojiniji pa niquiara.

³⁶ Soldadohuari Jesu macaatiriquiaajuhuj. Nojoriiri Jesu raateree piiquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

³⁸ Jesu nacaacuma, suruhuatuneeri rupotasaaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹ Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuaj!

⁴⁰ Narta sesa miiijaari na juaarii:

—¿Quiaateeri Pueyaso puereyashijia? Quiaari mosaanutaniyajuhua. ⁴¹ Pajaniya cutaraari sesa pa miiniuucua naquiya miishiyani. Paacua-jaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, jnojuajaari sesa miyashijia cutara!

⁴² Na nuhuaji, narta sesa miiija juaaniaari Jesu sequeree:

—Jesunaa, majaari cua niyajetanuujuua, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riucuaaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiri-aatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari. ⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojojua tiajinia, jjiyanohua shiquiiquia toquejiniji sohuacaari noojiaacoji sutequiaari puetunujuanaa querajaquera!

⁴⁶ Jiyacarijiuhua, Jesuuri nacaree:

—¡Cua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriQUIAJAJA piquiniuuquiaariuhua, jyanohua nojori tacaaniutia naa nojori monuucua Jesu.

⁴⁹ Saniniuujia, puetunu Jesu niishishano pueyajanaari tii jyojetarohuajaa, maajipohuajuhuj, canapuate Jesu nuhuajiquiaari Galilea jiyajiniijicujani. Puetunu nojorijianaari tucuaaanuji niqutiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinijinio. Cuno tiacaari Judea jiyajinijuhuj. Cuno pueyano sesa quiquiaari José. Nojuajaari Judiocuaca jiyaniijianucujinijinio quiquiaari. ⁵¹ Cuno Joseeri Pueyasoocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijiaara jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. ⁵² Naacujitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojinijiiri. Na jiunioceeri

cohuajaque quenaaruque toquejinia. Jesu quete niare tarijia na jiuutianishano saajiajiniiaari. Cuno raajinia, juhuanojuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaa, pananu tiuquishacari, tamonu juucaari tari cotequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajinijicuajani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶ Nojori riujiuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuajani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipo-huari tariquiiuajia raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquiiijosacari raajinia, saajiajiniji quejasano raa tiotiu niqutiushiiri tariucua tamocora shuquitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Majaari nojori niishiniu quiriquiaa taa nojori miiniutianiyani.

Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeeree:

—¿Casaara nia pajeya saminio pueyano macu niojosaquini? ⁶ Maja tari niya na quiniu. ¡Tari samiitiarohuano! ¿Niaateeri tari niyajetaree na sequesano niajaniya, Galilea jiyajinia na quishacarijia? ⁷ Nojuajaari tari nia sequecanucujaja, nojuaja sesa miijiaca niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuuniaa pueyajanaanio. ¹⁰ Cuno maajipohua, Jesu saquiriojosano pueya pohuataquiaariuhuani, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasaca maajipohuano. ¹¹ Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitiriijiaa maajipohua pohuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunio-cotaja cohujaque toque niquiquiaari maanoori. Pedroori juhua jiuujiaaju tacateyarohua na shiri-iquiniutia, na niquishanojiniji, maajipohua pohuatasanojinijinio.

Jesu tojitianaa pueya niquishacari Jesu, nojori quiasacari Emaús tiacajiniara

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tiriara. ¹⁴ Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵ Naa nojori pocoojosacari nucuacotej, Jesujuanaari jiyacari nojori rupuesee. Juhuaianiya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquianujuhuj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujunia quiquianu. ¡Jiyanohua maninia quijiaari

na cumaacata na miiijosano, na niishitiojosano-juhuaj! Pueyaso timitiasano quijiaari, puetunu pueya panishanojuanaanio. ²⁰ Pueyacuara secोजनाa jiyaniijianucua, mariyata pa camarucuaari na niqutiorucuaa Romano jiyaniijia na motesocoriquiano. Niyacutesanojinia mosaarucuaari. ²¹ Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaja. Quiarijiani, jiuujianaraca juucaari tari na shoconujiya na mosaanujiniji. ²² Tamasaca maajipohua canaa maanujinijinioori canaa shirioree nojori pohu-atasanota. Nojoriiri quiarijia tariquicuaji quiojoma Jesu raajinia. ²³ Nojoriiri maja na riuriatanu quishii na quete. Nojori tacatesacariuhua, nojoriiri canaa pahuatasuhua, nojorinia Pueyaso seya niqirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! ²⁴ Na nuhuaji, tamasa canaajinijinioori raajinia quiojiyareejuhuj. Seetanujuanaa na quiriquiaari, taa maajipohua sequeree canaacuajani. Maja cutaraari nojori niqiniu quirii Jesu.

²⁵ Jiyacaritij, Jesuuri nojori sequeree:

—Pueyanaa, majaquiiri juhuanojuaja nia niishiniu. Niaari taacanuyajaa puetunu tariucuaaanu Pueyaso sequesano caminiujiuniaa naajio-tasanoocujanaa nia tiuuniuria. ²⁶ ¿Majateeri naa na pahuatasaanu quiquiaaricujaja: “Cristoori co-teenu naa mosaanutaniyaquij. Na nuhuaji cutara, jiyano-hua cumaacaracara quiijara jiyatesaanutaniuhuari Jiyaniijiajanaa na quiniuria”?

²⁷ Jesuuri juhuacatecara nojori niishitiojoree puetunu tariucuaaanu Pueyaso Rupaajiniji-

jianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijianaanio.

²⁸ Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujuriquiaa. ²⁹ Nojoriiri nojoritia na jiyojetenu paniriquiaa jiyanoehua. Nojoriiri na sequeree:

—¡Niyaja canaata quia jiyojere! Paa tari niniya-reeni.

Naaratej, Jesuuri nojoritia jiyojese cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso sec-ojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijjaari juhua riateguequee. Jiyacariqui na niishituiquiri. Jesuuri saaja shaajequee cuniquijia nojori tajiniji. ³² Nojoriiri sequetooree:

—¡Jesucuaajaquiri quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanotej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanana riuriasuhua tii tariucua rerejono, mariyata socua narta Jesu pueyata. ³⁴ Tariucua tiajinia quiniaari Emaús tiacajiniji tiuquiiijionaa sequeree:

—¡Pa Jiyanijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquiiijionaari nojori pohuatareejuhuaj, taa Jesu pocoojoriquiaa nojoritariani, nucuaco nojori quiasacari, mariyata taa nojori niishirii nojuajani, pan na neecasesacari nojoriria.

Jesu muetasacariuhua na saquiriojosano pueyacua

(Mt 28.16-20; Mr 16.14-18; Jn 20.19-23)

³⁶ Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriiquitiuquii. Jiyanohua puereturiquiaari. Nojoriiri Jesu jiyaniriquiaa naaqui.

³⁸ Jesuuri nojori sequereeri:

—¿Casaara nia puere tiuyani? ¿Casaara nia jiyajenetaa janiyani? ³⁹ Cua juaashiquia nia niquiri, cua niohuacanio, nia niishiniuria janiyacuaajaari quiyani. ¡Cua cootiuri! ¡Cua niqitiuri! Naaquiiri maja cuaqueyaraca, maja nucuhearaca taa nia niquiya janiyacujani.

⁴⁰ Naa nojori na sequesacaritij, Jesuuri nojori niqitijioree na juaashiquia, na niohuacanio. ⁴¹ Puera nojori jiuujiatesacari, puera nojori shuquirishacarijuhuaj, nojoriiri taacanuuriquiaajaa, maja naasucua Jesu. Cunora, Jesuuri nojori sequereeri:

—¿Niaate miaquesocoriquiano jiitiaacuaa?

⁴² Nojoriiri Jesu niqitijioree sapitiaaja raqui caquishano. ⁴³ Jesuuri na maseree. Nojori niqiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari niajaniyacujani, pueyaracaanu niaata cua quishacari tarijia. Nia sequequiaaricujani, janiyari naa miishaanutaniyani, taa Moisés naajiotaquiaari janiyajiniicujani. Puetunu Pueyaso sequesano caminiujiuniaajanaari janiyajiniji naajionuutaquiaarijihua. Supuetana Davidri janiyajiniji naajiotaquiaarijihua na jaquequejoneejinia. Quiarjia tari tohuateerucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuaaanu Pueyaso Rupaa naajiotasano. ⁴⁶ Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷ Naa naajiotasaaquiaarijihua, Jerusalén tiacajinia, janiyajinijiiri pohuatasaanutaniya pueya niqiara, na nuhuaji puetunu jiyacajiniajanaano. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuajaari puetunu cua miishanojuanaa niqijiaca. ⁴⁹ Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuacaanuji niriqiano cumaaca maserejaatijia.

Jiyocuacaanu Jesu tacasacariuhua
(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqui nojori quishacarijia, Jesuuri na juaashiquia shiitioquiaari nojoriicuara na secojosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuara na secojosacarijia, Jesuuri nojori shuriucuaji tacanishaaquiaari jiyocuacaanu. ⁵² Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoehua shuquiriaatia quiriquiaa. ⁵³ Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaqueetatujua pueyaracaanuuri. Tariucuaja.

**Quiarinio pueyaso rupaa pa jiyaniijia
Jesucristojiniji pueyano rupaajinia
New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

90034700-94c6-5f48-ae9c-2383843fed68